



類函 百八



二百三五邊塞
二百三六邊塞
二百三七

加
427
108



43
卷



新金田圖書

此係八明治
卅八年八月
月廿八日
悼諸山同人
郎君田實一
所購以贈

新金田圖書印

淵鑑類函卷二百三十五

邊塞部六

原

西羌總敘

吐谷

羌無弋

吐蕃

增

大羊

胡

同

悉立

章求

拔

泥婆

羅

大勃

律

箇

失蜜

同

西羌總敘

原杜氏通典曰西羌本出三苗蓋姜姓也其國近衡山

及舜徙之三危漢金城之西南羌地是也濱於賜支

書曰河關西可千餘里有河曲羌謂之賜支蓋析支也

接漢河關縣屬金城郡其賜支在其西又按風俗通云

羌者其先本戎賤字至於河首縣地千里南接蜀漢徼

外蠻夷西北鄯善車師諸國其俗氏族無定或以父名

母姓為種號在古不立君臣無相長一強則分種為首

豪弱則爲人附落更相抄掠以力爲雄殺人償死無他
禁令其兵長在山谷短於平地不能持久而果於觸突
以戰死爲吉利病終爲不祥昔夏后相征畎夷七年然
後來賓至於后泄始加爵命由是服從殷武丁征鬼方
周王季伐西落更伐始呼翳徒之戎皆克之及武王伐
商羌髡率師會於牧野穆王西征獲其五王遷戎於太
原平王之末渭首有狄獯邾冀涇北有義渠洛川有大
荔渭南有驪伊洛間有楊拒泉臯潁洛以西有蠻氏在
中國與盟會後晉滅驪陸渾叛晉荀吳滅之楚執蠻
氏而盡囚其民周貞定王八年秦厲公滅大荔取其地

自是中國少寇惟餘義渠種最强盛屢爲秦患及昭王
起兵滅之始置隴西北地上郡焉始皇兵務東向故得
繁息秦平天下蒙恬西逐諸羌出塞漢初尚微弱景帝
時研種求徙於狄道安故武帝又西逐渡河湟初開河
西置四郡其後先零種圍枹罕漢兵擊平之始置護羌
校尉至宣帝代又寇金城趙充國立屯田且討且招降
者三萬餘人置金城屬國以處之自後賓服後漢光武
建武中初寇金城馬援討破降之徙七千口於三輔和
帝後又反叛豪滇零稱天子南入益州東犯趙魏寇及
雍城十餘年然後破散順帝永和帝中又叛漢將馬賢戰

歿後段熲窮討及靈帝末方始平定自光武以後匈奴
少事唯西羌屢梗焉永嘉以後吐谷渾興焉本遼東鮮
卑晉時數百戶西附於陰山屬晉亂遂吞并諸羌而有
其地至其孫葉延遂為強國後魏末其主夸呂自號可
汗建官多効中國洎隋煬帝遣觀王雄大破之其主伏
允遠遜收其地列置郡縣鎮戍後轉衰弱唐初吐蕃始
興焉其帥後魏末為臨松郡丞故其主有贊府之號高
宗時遂滅吐谷渾盡有其地將軍薛仁貴等大敗於大
非川儀鳳中工部尚書劉審禮又率兵十八萬敗歿於
青海調露中中書令李敬元又大敗於大非川武后如

意初王孝傑方大破之始復龜茲等鎮萬歲通天初又
寇梁州都督許欽明戰歿因贊府殺其名將諸欽陵之
後累破敗遂劣於曩時矣

羌無弋

原杜氏通典曰羌無弋爰劔者秦厲公時為秦所拘執
以為奴隸不知爰劔何戎之別也其後亡歸而秦人追
之藏於巖穴中得免與劔女遇合於野女恥其狀被髮
覆面羌人因以為俗遂俱亡入三河間三河即黃河析
支河湟中河
諸羌共畏事之推以為豪以射獵為事爰劔教之田畜
種人依之者益眾羌人謂奴為無弋以爰劔嘗為奴隸

故因名之其後世世為豪至爰劔曾孫忍時秦獻公初立欲復穆公之迹忍季父邛畏秦之威將其眾種人附落而南出析支河曲西數千里與諸羌絕遠不復交通其後子孫分別各自為種任隨所之或為羗牛種越舊羌是也或為白馬種廣漢羌是也或為參狼種武都羌是也忍及弟舞獨留湟中忍生九子為九種舞生十七子為十七種羌之興盛從此起矣漢景帝時研種留何率種人求守隴西塞今天水隴西等郡地於是徙留何等於狄道安故至臨洮氏道羌道並今隴西金城安鄉臨洮等郡武帝西逐諸羌乃渡河湟築令居塞初開河西列置四郡通道玉門隔

絕羌胡於是障塞亭燧出長城外數千里時先零羌與封養牢姐種解仇結盟與匈奴通合兵十餘萬共攻令居安故遂圍枹罕漢遣將軍李息將兵討平之始置護羌校尉統領焉羌乃去湟中依西海鹽池之左右漢遂因山為塞河西地空稍徙人以實之至宣帝時諸羌又相與解仇寇攻金城帝遣後將軍趙充國將兵討之充國屯田於臨羌東至浩疊務威信招降罕开及劫掠者解散其謀乃擊之時已發諸郡兵六萬人酒泉太守辛武賢奏言請即擊之天子下書令充國博議往返者三四遂兩從其志武賢出擊羌降破數千人詔罷兵獨充

國留屯田明年五月充國奏言羌本可五萬人軍凡斬首七千六百級降者三萬六千二百人溺湟饑死者五六千人定計遺脫與煎鞏黃羗並是羌種俱亡者不過四千人初置金城屬國以處降羌十三世至燒當復豪健其子孫更以燒當為種號自元帝以後數十年邊塞無事至王莽末豪滇良內侵燒當元孫及後漢初遂寇金城隴西司徒掾班彪上言今涼州部郡皆有降羌與漢人雜處習俗既異言語不通數為小吏黠人所侵奪窮恚無聊故致反叛請依舊制益州部置蠻夷騎都尉幽州部置領烏桓校尉涼州部置護羌校尉皆持節領護理其怨

結歲時循行問所疾苦又數遣使驛通導動靜使塞外羌夷為吏耳目州部因此可得做備今宜復如舊以明威防光武從之即以牛邯為護羌校尉建武十一年先零種寇臨洮今和政郡地隴西太守馬援破降之後徙置天水今郡隴西及金城郡南境地是扶風三郡自燒當至滇良世居河北大允谷後徙大小榆中由是始強至其子滇吾永平初漢遣中郎將竇固等擊破降之徙七千口置三輔而滇吾諸弟迷吾等數為寇盜章帝時馬防等討破之於是臨洮索西迷吾等悉降防乃築索西城時西海及大小榆左右無復羌寇隴麋相曹鳳上言西戎為

邊策部

羌無定

害前世所患臣且以近事言之自建武以來其犯法者常從燒當種起所以然者以其居大小榆土地肥美又近塞內諸種易以為非難以攻伐南得鍾存鍾存別以種羌廣其眾北阻大河因為固又有西海魚鹽之利緣山濱水以廣田畜故能强大常雄諸種今者衰困黨援壞沮親屬離叛餘勝兵者不過數百流亡逃竄遠依發羌臣愚以為宜及此時建復西海郡縣漢武帝遂諸羌置西海郡規固二榆廣設屯田隔塞羌胡交關之路遏絕狂狡窺欲之源又殖穀富邊省委輸之役國家可以無一方之憂於是拜鳳為金城西部都尉將徙徙出屯龍者金城長史

上官鴻開置歸義建威屯田二十七部侯霸復上置東西邯屯田五部增留逢二部帝皆從之列屯夾河合四十四部四年大將軍鄧騭議欲棄涼州虞詡曰不可今羌所以不敢入據三輔為腹心之患者以涼州在後故也其土人所以摧鋒無反顧之心者為臣屬於漢故也若棄其境域徙其人眾安土重遷必生異志如使雄豪相聚席卷而東雖虎賁為卒白起太公為將亦恐不之禦當今之計者宜令四府九卿各辟彼州數人其牧守令長子弟皆除為冗官外以勸勵答其功勤內以拘致防其邪計誠能如此則可無患於是四府皆從詡議滇零

死于零昌立元初元年遣兵屯河內通谷衝要三十三所皆作塢壁設鳴鼓零昌進兵寇雍城遣任尚為中郎將將羽林緹騎五營子弟屯三輔尚臨行懷令虞詡說尚曰使君頻奉國命討逐寇賊三州屯兵二十餘萬人棄農桑疲苦徭役而未有功效勞費日滋若此出不克誠為使君危之尚曰憂惶久矣詡曰兵法弱不攻強走不逐飛自然之勢也今羌皆馬騎日行數百來如風雨去如絕弦以步追之勢不相及所以曠日而無功也為使君計者莫若罷諸郡兵令出錢數千二十人共市一馬如此可捨甲冑馳輕兵以萬騎之衆逐數千之寇追

尾掩截其道自窮使人利事大功立矣尚即上言用其計乃遣輕騎抄擊斬首數百級明年秋漢又築馮翊北界候塢五百所自後頻破之諸羌瓦解三輔益州無復寇警永和中以來機為并州刺史劉秉為涼州刺史梁商謂曰荒服荒忽無常而統領之道亦無常法臨事制宜略依其俗今二君素性疾惡欲分明白黑孔子曰人而不仁疾之已甚亂也務防其大故忍其小過機等天性虐刻遂不能從到州之日多所擾發五年夏且凍傳難種羌等遂反叛金城與西塞及湟中雜種羌大寇三輔桓帝延熹二年燒當八種寇隴右以段熲為校尉將

兵及湟中義從羌二千人擊破之追討南渡河募先登懸索相引刀折矢盡且鬪且行晝夜相攻割肉食雪三十餘日遂至河首積石山出塞二千餘里前後斬首並受降各萬餘人東羌先零等自覆沒馬賢後既降又叛帝以問頗對曰狼子野心難以恩納唯當白刃加領耳計其所餘三萬餘落居近塞內久亂并涼累侵三輔西河上郡已各內徙安定北地復至單危自雲中五原西至漢陽二千餘里匈奴種羌並擅其地是爲癰疽伏疹留滯脇下如不加誅轉就滋大今若以騎五千步兵萬人車三千兩三冬二夏足以破定無慮用費爲錢五十

四億如此可令羣羌破盡匈奴長服內徙郡縣得反本土伏計永初中諸羌反叛十有四年用二百四十億永和之末復經七年用八十餘億費耗若此猶不誅盡餘孽復起於茲作害今不暫疲人則永寧無期帝許之靈帝建寧初頗與先零諸種戰斬首八千餘級頗復追之且破且追士皆重繭旣到涇陽餘寇四千落悉散入漢陽山谷間時張奐上言東羌雖破餘種難盡頗性果慮輕負敗難常宜且以恩降可無後悔詔書下頗頗復上書曰臣本知東羌雖衆而軟弱易制所以比陳愚慮思爲永寧之算而張奐說羌強難破宜用招降云臣兵連

年累見折衄又言羌一氣所生不可誅盡山谷廣大不可空靜臣伏念中興以來羌寇最盛誅之不盡雖降復叛今先零雜種累以反覆攻沒縣邑剽掠人物上天震怒假手行誅臣自動兵衆和師克自橋門以西落川以東非爲深險絕域之地車騎安行無應折衄案與駐軍二年不能平寇証辭空說僭而無徵何以言之昔先零作寇趙充國徙居內地煎當亂邊馬援遷之三輔始服終叛至今爲梗故遠識之士以爲深憂今傍郡戶口單少數爲羌所創毒而欲令降徒與之雜居是猶種枳棘於良田養虺蛇於室內也本規三歲之費用五十四億

今適周年所耗未半而餘寇殘燼將向殄滅臣每奉詔書軍不內御願卒斯言一以任臣臨時量宜不失權便二年頗遂進營逼諸羌大敗之於瓦亭山羌衆潰東奔復聚射虎谷分守諸谷上下門頗乃令千人於西縣結木爲柵廣二十步長四十里遮之然後兵擊之窮山深谷之中處處破之斬其渠帥以下萬九千級獲畜產諸物不可勝數於是東羌悉平

湟中月氏胡

原杜氏通典曰湟中月氏胡其先大月氏之別也在張掖酒泉地爲匈奴冒

音

頓

所殺餘種分散西踰葱嶺其

羸弱者南入山阻依諸羌居止漢將霍去病破匈奴取西河地開湟中於是月氏來降與漢人錯居雖依附縣官而首施兩端言首施猶其從漢兵戰鬪隨勢強弱被服飲食言語略與羌同亦以父名母姓為種其大種有七勝兵合九千餘人分在湟中及令居又數百戶在張掖號曰義從胡後漢靈帝中平初與北宮伯玉等反殺護羌校尉泠徵金城太守陳懿遂寇亂隴右焉

氏 楊氏 宕昌 武興

原杜氏通典曰氏者西胡之別種在冉駝東北今通化東廣漢之西今梓潼遂寧德君長數十而白馬最大漢

武帝元鼎六年開分廣漢西部合為武都郡今同谷郡

排其種人分竄山谷或在上祿今同谷郡或在汧隴左右今

水汧陽郡地其種非一或號青氏或號白氏或稱蜻氏此蓋

中國人即其服色而名之也 **增**宋書曰略陽清水氏

楊氏秦漢以來世居隴右為豪族漢獻帝建安中有楊

騰者為部落大帥騰子駒勇健多計略始徙仇池仇池

地方百頃因以百頃為號四面斗絕高平地方二千餘

里羊腸蟠道三十六回山上豐水泉煮土成鹽駒後有

名千萬者魏拜為百頃氏王千萬子孫名飛龍漸強盛

晉武假征西將軍還居略陽無子養外甥令狐氏子為

邊塞部

氏

子名戊撝晉惠帝元康六年避齊萬年之亂率部落四千家還保百頃自號輔國將軍右賢王關中人士奔流者多依之文帝元嘉十九年龍驤將軍裴方明等伐氏尅仇池南史曰河南王者其先出自鮮卑慕容氏廆嗣位吐谷渾西徙地在河南故以為號吐谷渾詳見後宕昌國在河南國之東益州之西北隴西之地西羌種也宋孝武世其王梁瑾忽始獻方物梁天監四年王梁彌博來獻甘草當歸詔以為河涼二州刺史隴西公宕昌王佩以金章子彌泰大同七年復策授以父爵位其衣服風俗與河南略同鄧至國居西涼州界羌別種也宋文

帝時王象屈耽遣使獻馬梁天監五年鄧至王象舒彭遣使獻黃耆馬其俗呼帽曰突何其衣服與宕昌同武興國本仇池楊難當自立為秦王宋文帝遣裴方明討之難當奔魏其兄子文德又聚眾葭蘆宋因授以爵位魏又攻之文德奔漢中文德弟文度立以弟文洪為白水太守屯武興宋世以為武都王武興之國自於此矣難當族弟廣香又攻殺文度自立為陰平王葭蘆鎮主文洪死以族人集始為武都王集始子紹先襲爵位紹先死子智慧立梁大同元年尅復漢中智慧遣使上表求率四千戶歸梁詔許焉即以為東益州其國東連

秦嶺西接宕昌其大姓有苻氏姜氏梁氏言語與中國同著烏阜突騎帽長身小袖袍小口袴皮鞞地植九穀婚姻備六禮知書疏種桑麻出紬絹布漆蠟椒銅鐵

吐谷渾

原杜氏通典曰吐谷渾本遼東鮮卑也西晉時羌帥徒河涉歸有二子長曰吐谷渾少曰若洛廐胡罪反代統部落別為慕容氏渾庶長廐正嫡父在時分七百戶與渾渾與廐二部俱牧馬馬鬪相傷廐徑遣使謂渾曰先公處分與兄弟異部牧馬何不相遠而令馬鬪渾曰馬是畜生食草飲水春氣發動所以致鬪鬪在於馬而怒於

人耶乖別甚易今當去汝於萬里之外矣於是擁馬西行乃西附陰山屬永嘉之亂始度隴西止於枹罕而後子孫據有甘松之南洮水之西南極於白蘭在益州西北其地四時常有冰雪惟六七月雨雹甚盛若晴則風飄沙礫有麥無穀其青海周迴千餘里海中有小山每冬冰合後以良牝馬置此山至來冬收之馬有孕所生得駒號曰龍種吐谷渾嘗得波斯草馬放入海因生驄駒能行千里故時稱青海驄焉至其孫葉延以禮云公孫之子得以王父字為氏吾祖始自昌黎先宅於此今以吐谷渾為氏六傳至夸呂隋開皇中夸呂侵弘州遣

上柱國元諧擊之賊悉發國中兵自曼頭至於樹敦甲
 騎不絕諧頻擊破之夸呂率其親兵遠遁其名王十三
 人各率部落而降夸呂在外且百年死以後還以慕容
 為姓其子伏允立煬帝初伏允遣子順來朝帝令鐵勒
 襲大敗之伏允東走保西平帝復令觀王雄以掩之大
 破其眾伏允遁逃部落來降十萬餘口伏允懼南遁於
 山谷間其故地皆空自西平臨羌城以西且末以東祁
 連以南雪山以北東西四千里南北二千里皆為隋有
 置郡縣鎮戍發天下輕罪徙居之其地在今西平郡之西張掖酒泉郡之北
隋氏置西海且末河源等郡於是留順不之遣伏允無以自資率其

徒數千騎客於党項大業末天下亂伏允及順復其故
 地唐貞觀中李靖侯君集破滅之伏允遠遁為左右所
 殺其子大寧王順歸降於是重建其國封順為西平郡
 王仍加趙巨屈反胡呂烏甘豆可汗之號旋又為其下所
 殺十年立順子諾曷鉢為河源郡王主其國自爾衰弱
 而吐蕃強盛而高宗時為其破滅諾曷鉢以餘眾復來
 降於靈州之境置安樂州以諾曷鉢為刺史其故地並
 沒於吐蕃後又封渠帥慕容宣超為青海王武太后朝
 郭元振上安置降吐谷渾狀曰臣昨見唐休璟張錫等
 眾議商量其吐谷渾部落或擬移就秦隴或欲移近豐

吐谷渾

吐谷渾

吐谷渾

靈責令漸去邊隅使居內地用爲防閑之要冀免背叛之虞臣以爲並是偏見之一端未爲久長之深策若近秦隴則與監牧雜居如在豐靈復與默啜甫爾必以慮其翻覆須有遷移縱至中土安可易其本性至如耽爾乙句貴往年王孝傑奏請自河源軍徙居靈州用爲恆便及其逃叛之日穿監牧掠馬羣所在傷夷大損州縣是則遷居中土無益之明驗矣往者素和貴雖背聖化只從當所居地叛走其於中國無所損傷但是失少許吐渾耳豈與句貴之爲害同日而語哉今吐谷渾之降者非驅畧而來皆是渴慕聖化衝鋒突刃棄吐蕃而至

者也臣謂宜當循其情以爲制勿驚擾之使其情地稍安則其係戀心亦日厚當涼州降者則宜於涼州左側安置之當甘州肅州降者則宜於甘肅左側安置之當瓜沙降者則宜於瓜沙左側安置之但吐蕃所降之處皆是其舊居之地斯輩旣投此地實有戀本之情若因其所投而便居之其情易安因數州而磔裂之則其勢自分順其情分其勢而不擾於人善矣

續文獻通考曰遼太祖天贊三年攻拔其城後自太宗天顯八年至聖宗統和二年無歲不通貢興宗重熙十一年以吐谷渾多鬻馬於夏詔沿邊築障塞防之自後無聞

吐谷渾二

增老駝知風

神駒放海

舊唐書地兼鄯善且末西北有流沙數百里夏有熱風傷

弊行旅風將至老駝知之引項而鳴以口鼻埋沙中人以為候即以氈蔽口鼻而避其患

青海周千里

黃沙號一州

立自號驃騎將軍沙州

刺史部內有黃沙周迴數百里不生草木因號沙州

西登強山觀墊江之源

北望積石窮河水所出

北史阿豺昇西強山觀墊江源問於羣寮曰此水東流更有何

名由何郡國入何水也長史曾和曰此水經仇池過晉壽出宕渠始荒墊江至巴郡入江度廣陵歸於海阿豺

曰水尚知歸吾雖塞表小國而無所歸乎遣使通宋獻其方物舊唐書侯君集與江夏王道宗達於柏梁北

源積石山觀河

党項一

原杜氏通典曰党項羌在古析支之地漢西羌之別種

党項始強南雜春桑迷桑等羌北連吐谷渾其種每姓

別自為部落一姓之中復分為小部落大者萬餘騎小

者數千騎不相統一有細封氏費聽氏往利氏頗超氏

野辭氏房當氏來禽氏拓拔氏最為強族

唐貞觀至上元間內附散居西北邊元和以後頗相率

為盜會昌初武宗置三使以統之在邠寧延者為一使

在鹽夏長澤者為一使在靈武麟勝者為一使五代亦

嘗入貢今靈夏綏麟府環慶豐州鎮戎天德振武軍並

其族帳太祖建隆二年代州刺史折也埋來朝也埋党

項之大姓世居河右有捍邊之功故授以方州召令入
覲而遣還 續文獻通考曰於遼叛服不常開泰二年
西南面招討使斜軫奏党項諸部叛者皆遁黃河北模
赧山其不叛者曷黨烏迷兩部據其地今復西遷詰之
則曰逐水草不早圖之恐遂為患又聞前後叛者多投
西夏西夏不納詔遣使再問西遷之意若歸故地則可
就加撫諭使不報上怒遂西伐五年其長魁可來降興
宗重熙十三年復叛附夏國元昊親執党項二部首長
來降

党項二

增五月草生

中秋雪降

舊唐書土無三穀氣候多風
寒五月草始生八月霜雪降

候草木以記歲

殺牛羊以祭天

北史無文字宜候
草木以記歲時三

年一聚會殺
牛羊以祭天

一種在赤水之西

別部居雪山之下

舊唐書又有黑党項在赤水之西
雪山党項姓破丑氏居雪山之下

吐蕃

原杜氏通典曰吐蕃在吐谷渾西南不知有國之所由
或云禿髮利鹿孤有子樊尼其主儻檀為乞伏熾盤所
滅樊尼率餘種依沮渠蒙遜其後子孫西魏時為臨松
郡丞與主簿皆得衆心因魏末中華擾亂招撫羣羌日
以强大遂改姓為寧 蘇骨反 敦野至今故其人號其主曰

吐蕃

吐蕃

吐蕃

贊府貴臣曰主簿又或云始祖贊普自言天神所生號
鷓堤悉補野因以為姓一也或云本姓棄蘇農也其
國出鄯城五百里過烏海入吐谷渾部落彌多彌蘇毗
及白蘭等國至吐蕃界其國都號為邏娑城用法嚴整
議事則自下而起因人所利而行之此其所以能強且
久也重壯賤老重兵死惡病終以累代戰沒者為甲門
臨陣奔北者懸狐尾於其首表其似狐之怯其贊普弄
贊雄霸西羌隋開皇中其主論贊索弄贊都牂牁西匹
播城以五十國西南與婆羅門接唐貞觀五年正月
以宗室女封文成公主降於吐蕃贊普命禮部尚書江

夏王道宗送之弄贊親迎於河源見王人執子壻禮甚
謹歎大國服飾禮義之美俯仰有媿沮之色謂所親曰
我祖父未有通婚大國者今我得尚唐公主當築一城
以誇後代也武后如意初武威軍總管王孝傑大破吐
蕃復龜茲于闐疏勒碎葉四鎮至萬歲通天初又寇涼
州執都督許欽明欽陵兄弟皆有才畧欽陵多居中諸
弟分領方面諸蕃憚之二年吐蕃大論欽陵遣使請和
武太后遣前梓州通泉縣尉郭元振往至野狐河與陵
遇曰大國久不許陵和陵久不遣蕃使以久無報命故
去秋有甘涼之抄斯實陵罪今欲和好能無懼乎振乃

謂曰論先考東贊以宏才大畧服事先朝結好通親荷
榮承寵本期傳之永代垂於無窮論不慕守舊恩中致
猜阻無故自絕日尋干戈屢犯我河湟且父通之子絕
之豈爲孝乎父事之子叛之豈爲忠乎然論英聲籍甚
遐外各自爲主奚爲懼乎陵曰今天恩旣許和好其兩
國戍守請罷置以便萬姓豈不休哉然以西十姓突厥
四鎮諸國或時附蕃或時歸漢類多翻覆乞拔去鎮守
分離屬國各建侯王使其國自爲君人自爲守旣不疑
漢又不屬蕃豈不人免憂虞振曰十姓四鎮本將鎮靜
我落以撫寧西土通諸大邦非有他求論今奚疑而有

是虞乎陵曰然緣邊守將多好功名見利而動罕守誠
信此蕃國所爲深憂振曰十姓諸部與論種類不同山
川亦異爰覽古昔各自區分復爲我編人積有年歲今
論欲一言而分離數部得非昧弱苟利乎陵曰使人豈
不疑陵貪冒無厭謬陳利害窺竊諸部以爲漢邊患耶
陵若愛漢土地貪漢財幣則青海湟川實邇漢邊其去
中州蓋三四千里必有窺羨何不爭利於此中而突厥
諸部懸在萬里之外磧漠廣莽殊異中國安有爭地於
萬里外而能爲漢邊患哉捨近務遠計豈然也但中州
人士深謀多計天下諸國皆爲漢并雖大海之外窮塞

之表靡不磨滅今吐蕃塊然獨在者非漢不貪其土地
不愛其臣僕實陵兄弟小心謹密得保守之耳往者高
宗以劉審禮有清海之役乃使黃仁素賈守義來和陵
之上下將士咸無猜忌故邊守不戒嚴和事曾未畢以
為好功名人崔知辯從五俟斤路乘間隙瘡痍我衆驅
掠牛羊蓋以萬計自此陵之國人大危懼和事矣今之
此求但懼好功名者之吞噬冀此為翰屏以虞之實非
有他懷焉振曰茲事漫汗體大非末吏所能明論當發
使奉章以聞取裁於聖主陵乃命郎宗乞思若為使振
曰今遣使之後國不可更犯漢邊且番使前後入朝不

時遣者良以使去之後兵仍犯漢故朝廷躊躇曰是給

徒改

我也以為偵諜不以為使人遂遷延無報今若踵

前陵塞是故陷所去人使孰謂請和也陵俛首蹶蹶久
之曰陵與國人咸憾崔知辯之前事故嘗有此舉以虞
好功者之來侵比實以選練騎士三萬分路出師使人
既有此言今既於和事非便安可相違既罷兵散卒遂
指天為信 **續文獻通考**曰西番即吐蕃唐末衰弱
種類分散入內屬者謂之熟戶餘謂之生戶宋時朝貢
不絕神哲高三朝皆授以官遼時亦入貢又有小蕃大
蕃胡母思山蕃之別元世祖時郡縣其地設官分職以

吐蕃僧八思巴為大寶法王帝師領之嗣者數世弟子
號司空司徒國公佩金玉印章者前後相望其山則崑
崙極高峻雪至夏不消綿亘五百餘里黃河經其南其
風俗樸魯上下一心君臣為友吏治無文字懷恩重利
尊釋信誑其產金銀銅錫犛牛名馬天鼠皮獨峰駝青
稞麥豈豆獐羊地距松潘四百八十里東北鄰陝西東
界四川雲南明洪武六年大將軍徐達征西番既拔河
州於是河州以西朵甘思烏思藏等部悉歸令故有官
者至京授職遂以攝帝師喃加巴藏卜為熾盛佛寶國
師元國公南哥思丹八亦監藏等為都指揮同知宣慰

使元帥招討等官分其地設都指揮使司二指揮使司
一宣慰使司三招討使司六千戶所十有七以部之仍
其俗封番僧為六王曰灌頂國師曰贊善王曰贊化王
曰正覺大乘法王曰如來大寶法王皆給印章誥命自
是襲封不易

增聯毳帳以為居 有城郭而不處 唐書吐蕃傳其國
而不處聯毳帳以為居號 昭陵刊像形之石 唐書吐蕃傳其國
大拂廬部人處小拂廬 赤嶺暨 君號贊普有城郭
分界之碑 善唐書高宗嗣位弄讚致書云天子初即位
若臣下有不忠之心者當勒兵以赴國除討
并獻金銀珠寶十五種請置太宗前高宗嘉之乃刊石
像其形列昭陵元闕下 又曰詔御史大夫崔琳充使

吐蕃

洪鑑類考卷三十三
報聘仍於赤嶺各豎分
界之碑約以更不相侵

吐蕃三

增疏唐于休烈請不賜吐蕃書籍疏曰臣聞吐蕃之性
慄悍果決敏情恃銳喜學不回若達於書必能知戰深
於詩則知武夫有師干之試深於禮則知月令有廢興
之兵深於傳則知用師有詭詐之計深於文則知往來
有書檄之制何異借寇兵而齎盜糧也臣聞魯秉周禮
齊不加兵吳獲乘車楚屢奔命且公主遠適異國返求
良書愚臣料之恐非本意慮有奔北之類教於中若陛
下慮失蕃情以備國信必不得已請去春秋當周道既

衰諸侯強盛禮樂自出戰伐交興情偽於是乎生變詐
於是乎起則有以臣名君之事取威定霸之名若與此
書國之患也傳曰于奚請曲縣繁纓仲尼云惜也不如
多與之邑惟名與器不可假人彼固貪婪貴貨易土正
可錫之錦綺厚以玉帛何必率從其求以資其智

大羊同

增文獻通考曰大羊同東接吐蕃西接小羊同北直于
闐東西千餘里勝兵八九萬人其人衣氍毹以畜牧為
業地多風雪冰厚文餘所出物產頗同蕃俗無文字但
刻木結繩而已刑法嚴峻其王姓姜葛有四大臣分掌

海鏡類考卷三十三
國事自古未通中國唐貞觀十五年遣使來朝

悉立

增文獻通考曰悉立在吐蕃西南戶五萬有城邑邨落依溪澗丈夫以繒綵纏頭衣氎褐婦人多著短裙其畜多水牛殺羊雞豕穀宜秔稻麥豆饒甘蔗諸果喪制以黑爲衣一年就吉刑有刑劓羈事吐蕃自古未通中國唐貞觀二十年遣使獻方物

章求拔

增文獻通考曰章求拔或云章揭拔本西羌種也在悉立西南居山內近代移出西接東天竺遂衣服變西羌

之俗其地延袤八九百里勝兵二千餘人居無城郭好爲寇掠商旅患之聞悉立入朝亦遣使朝貢

泥婆羅

增文獻通考曰泥婆羅國在吐蕃西其俗剪髮與眉齊穿耳瑠檀竹箒緩至肩者以爲姣麗食用手多商賈少田作以銅爲錢面文爲人背文爲馬以板爲屋壁皆雕畫俗重博戲頗解推測盈虛兼通曆術事五天神鑿石爲像每日清水浴神烹羊而祭其王那陵提婆身著眞珠諸寶玉垂金鈎玉瑠佩寶裝伏突坐獅子座常散花燃香大臣及左右並坐於地有阿耆婆彌池周迴二千

餘步以物投之即生煙焰懸釜而炊須臾而熟唐永徽二年遣使朝貢

大勃律 小勃律(附)

增文獻通考曰大勃律或曰布露直吐蕃西與小勃律接西鄰北天竺烏菴屬吐蕃唐萬歲通天逮開元時三遣使朝故冊其君蘇弗舍利支離泥為王死又冊蘇麟陀逸之嗣王凡再遣使貢方物小勃律去京師九千里而羸開元初王沒謹忙來朝詔冊為小勃律王至蘇失利之立為吐蕃陰誘妻以女故西北二十餘國皆臣吐蕃貢獻不入安西都護三討之無功天寶六載詔副都

護高仙芝伐之平其國於是拂菻大食七十二國皆震恐歸附執小勃律王及妻歸京師詔改其國號歸仁軍募千人鎮之

箇失蜜

增文獻通考曰箇失蜜或曰迦濕彌邏北距勃律五百里環地四千里山回繚之他國無能攻伐王治撥邏勿還布邏城西瀕彌那悉多大河地宜稼多雪不風出火珠鬱金龍種馬毛褐世傳地本龍地龍徙水竭故往居之唐開元初遣使者朝八年詔冊其主真陀羅祕利為王間獻胡藥天木死弟木多筆立遣使者佛理多來朝

且言有國以來並臣天可汗受調發國有象馬步三種
兵臣身與中天竺王阼吐蕃五大道禁出入戰輒勝有
如天可汗兵至勃律者雖衆二十萬能輸糧以助又國
有摩訶波多磨龍池願爲天可汗營祠因丐王冊詔內
佛理多宴中殿賜賚優備冊木多筆爲王自是職貢有
常其役屬五種亦名國所謂咀义始羅者地二千里有
都城西南餘七百里得僧訶補羅地三千餘里亦治都
城東南山行五百里得烏刺尸地二千里有都城宜稼
穡東南限山千里即箇失蜜西南行險七百里得半笈
蹉地二千里又得曷邏闐補羅者其大四千里有都城

多山阜人驍勇五種皆無君長云

骨咄

增文獻通考曰骨咄或曰珂咄羅廣長皆千里王治思
助建城多良馬赤豹有四大鹽山山出烏鹽唐開元十
七年王俟斤遣子骨都施來朝二十一年王頡利發獻
女樂又遣大首領多博勒達于朝貢天寶十一載冊其
王羅金郎爲葉護

蘇毗

增文獻通考曰蘇毗本西羌族爲吐蕃所并號孫波在
諸部最大東與多彌接西距鷓鴣峽戶三萬唐天寶中

王沒陵贊欲舉國內附為吐蕃所殺子悉諾率首領奔隴右節度使哥舒翰護送闕下元宗禮之

多彌

增文獻通考曰多彌亦西羌族役屬吐蕃號難磨濱犁牛河土多金貞觀六年遣使者朝貢

伊吾城

增文獻通考曰伊吾城者漢宜禾都尉所治商胡雜居勝兵千附鐵勒人驍悍土良沃隋末內屬置伊吾郡復臣突厥貞觀四年來朝頡利滅舉七城降列其地為西伊州

白蘭

增文獻通考曰白蘭羌之別種東北接吐谷渾西至毗利摸徒南界鄯鄂風俗物產與宕昌同勝兵萬人勇於戰鬪唐武德六年使者入朝以其地為維恭二州貞觀六年與契苾數十萬內屬永徽時特浪生羌卜樓大首領凍就率眾來屬以其地為劔州龍朔後白蘭春桑及白狗羌為吐蕃所臣籍其兵為前驅白狗與東會州接勝兵纔千人在西北者天授中內附戶凡二十萬以其地為朝吳浮歸十州散居靈夏間

山北陂河西行循河曰陂史記曰陂山東道至莎車為南道西踰葱嶺則出大月氏安息自車師前王庭隨北山陂河西行至疏勒為北道西踰葱嶺則出大宛康居奄蔡焉耆自張騫開西域之迹其後霍去病擊破匈奴右地降渾邪休屠王屠音除遂空其地始築令居以西今音鈴縣名初置酒泉郡後稍發徙人充實之分置武威張掖燉煌列四郡據兩關焉自李廣利伐大宛之後西域震懼多遣使來貢獻於是東自燉煌西至鹽澤往往起亭障是時軍旅連出師行二三十年海內虛耗征和中貳師李廣利以軍降匈奴帝既悔遠征伐而搜粟都尉桑弘羊與丞相

御史奏言故輪臺以東捷枝渠黎皆故國地輪臺渠黎地名廣饒水草有溉田五千頃以上處溫和田美可益通溝渠種五穀與中國同時熟田一歲有積穀募民壯健有累重敢徙者詣田所就畜積為本業益墾溉田稍築列亭連城而西以威西國帝深陳既往之悔乃下詔曰前有司奏欲益民賦三十助邊用每口增三十錢是重困老弱孤獨也而今又請遣卒田輪臺輪臺西於車師千餘里前開陵侯擊車師時開陵侯匈奴介危須尉黎樓蘭六國皆發畜食迎漢軍又自發兵凡數萬人王各自將共圍車師降其王諸國兵便罷力不能復至道上食漢軍漢軍

破城食至多然士自載不足以竟師强者盡食畜產羸者道死數千人朕發酒泉驢橐駝負食出玉門迎軍吏卒起張掖不甚遠然尚廝留甚衆廝留言是前後逮曩者朕之不明以軍候弘上書言匈奴縛馬足置城下馳言秦人我乞若馬謂中國人為秦人習故言也乞若猶言乞汝乞皆氣又漢使者久留不還故遣貳師將軍欲以為使者威重也古者卿大夫與謀參以蓍龜不吉不行乃者丞相御史二千石諸大夫郎為文學者皆言祥善而易之卦得大過爻在九五其辭曰枯楊生華何可久也謂匈奴破不久匈奴困敗公車方士太史理星占氣及太卜龜著皆以為吉匈奴必破時不可得也

卦諸將貳師最吉故朕親發貳師今謀卦兆皆反繆失一狼走千羊乃者貳師敗軍士死略離散悲痛常在朕心今請遠田輪臺欲起亭隧是擾勞天下非所以優民也朕不忍聞且匈奴得漢降者常提掖搜索問以所聞搜索者恐其或私齎文書今邊塞未正闌出不禁障候長吏使卒獵獸以皮肉為利卒苦而烽火乏失亦上集不得後降者來若捕生口虜乃知之當今務在禁苛暴止擅賦力本農修馬復令因養馬以兔徭賦也以補缺無乏武備而已郡國二千石各上進畜馬方略補邊狀與計對由是不復出軍而封丞相車千秋為富民侯以明休息思富養民也昭

邊塞部 西戎總序 三

帝時乃用桑弘羊前議以給使外國者至宣帝遣衛司
馬使護鄯善以西數國及破姑師未盡殄分以為車師
前後王及山北六國時漢獨護南道未能盡并北道也
神雀三年匈奴日逐王來降護鄯善以西使者鄭吉迎
之乃因使求并護北道故號曰都護都護之起自古置
矣由此匈奴益弱不得近西域於是徙屯田於北胥鞬
披莎車之地韃居言反屯田校尉始屬都護都護督察
烏孫康居諸外國都護理烏壘城去陽關二千七百四
十里與渠黎田官相近土地肥饒於西域為中故理焉
至元帝復戍已二校尉屯田於車師前王庭戊巳中央
鎮覆四方

又開渠播種以為哀平間自相分割為五十五國凡國
厭勝故稱戍已焉自譯長城長君監吏大祿伯長千長都尉且子餘渠當
戶將相至侯王皆佩漢印綬凡三百七十六人而康居
大月氏安息罽賓烏弋之屬皆以絕遠不在數中其來
貢獻則與相報不督錄總領也至王莽時四邊擾亂與
中國遂絕並復役屬匈奴前往西域有二道自元始以
後有三道從玉門關出經婁羌婁而轉西越葱嶺經懸
度入大月氏為南道從玉門關西出發都護并迴三隴
沙北頭經居盧倉從沙西北過龍堆到故樓蘭轉西詣
龜茲至葱嶺為中道從玉門關西北出經橫坑辟三隴

沙及龍堆出五船皆到車師界戊巳校尉所理高昌轉西與中道合龜茲新道後漢永平中匈奴乃脇諸國共寇河西郡縣城門晝閉明帝乃命將北征匈奴取吾廬地置宜禾都尉以屯田遂通西域于闐諸國西域自絕六十五載乃復通焉明年始復置都護戊巳校尉章帝時焉耆龜茲攻沒都護陳睦匈奴車師圍戊巳校尉章帝不欲疲敝中國以事邊境乃迎還戊巳校尉不復遣都護罷屯田匈奴因遣兵守伊吾地時軍司馬班超留于闐綏集諸國和帝永元初竇憲大破匈奴因遣副校尉閻槃掩擊伊吾破之三年班超遂定西域因以超爲

都護居龜茲復置戊巳校尉於是五十餘國悉納質內屬其條支安息諸國至於海濱四萬里外皆重譯貢獻九年班超遣掾甘英窮臨西海而還皆前代所不至莫不備其風土傳其珍怪焉及班被徵以任尚爲都護尚謂超曰猥承君後宜以誨之超曰塞外吏士本非孝子順孫皆罪過徙補邊屯難養易敗今君性嚴急水清無大魚察政不得下和宜蕩佚簡易寬小過總大綱而已超去後尚私謂所親曰我以班君當有奇策今所言平平耳尚至數年安帝初西域背叛頻攻圍都護任尚段禧等朝廷以其險遠難相應赴詔罷都護由此遂棄西

漢書卷一百一十六
西域傳第六十六
域北匈奴即復收屬諸國共為邊寇十餘歲燉煌太守曹宗請出兵擊匈奴復欲進取西域鄧太后不許但令置護西域副校尉居燉煌羈縻而已其後匈奴連與車師入寇河西漢不能禁議者因欲閉玉門陽關以絕其患尚書陳忠上疏以為燉煌宜置校尉按舊增四郡屯兵以西撫諸國庶足折衝萬里震怖匈奴太后又召班超之子勇問之勇議曰昔者孝武皇帝患匈奴強盛開通西域諸論者以為奪匈奴府藏斷其右臂遭王莽篡位徵求無厭遂以背叛光武中興未遑外事故匈奴負強驅率諸國及至永平再攻燉煌河西城門晝閉明帝

命武臣出征西域故匈奴遠遁邊境得安及至永元莫不內屬會間者羌亂西域復絕匈奴遂遣責諸國備其逋租高其價直嚴以期會鄯善車師皆懷忿怨思樂事漢其路無從前所以時有叛者皆由牧養失宜還為其害舊燉煌郡有營兵三百人宜復之復置護西域副校尉居於燉煌如永元故事又宜遣西域長史將五百人屯樓蘭西當焉耆龜茲徑路南疆鄯善于闐心膽北捍匈奴東近燉煌如此誠便於是從忠勇議乃以勇為西域長史將五百人西屯柳中勇遂破平車師自建武至於延光西域三絕復通順帝永建二年勇復擊降焉耆

於是龜茲疎勒于闐莎車等十七國皆來服從而烏孫葱嶺以西遂絕六年帝以伊吾舊膏腴之地傍近西域匈奴資之以爲鈔暴復令開設屯田如永元時事置伊吾司馬一人自陽嘉以後朝威稍損諸國驕放轉相陵伐矣自魏及晉中原多故西域朝貢不過三數國焉至後魏太武帝使董琬使西域還具言其地爲三域自葱嶺以東流沙以西爲一域姑墨以南月氏以北爲一域兩海之間水澤以南爲一域三域之內諸小渠長蓋以百數其出西域更爲四道自玉門流沙西行二千里至鄯善爲一道自玉門度流沙北行二千二百里至車師

爲一道從莎車西行一百里至葱嶺西千三百里至伽倍爲一道自莎車西南五百里至葱嶺西南千三百里至波路爲一道焉於是貢獻者十有六國孝文延興中尚書奏以燉煌一鎮界遠西北寇賊路衝慮或不固欲移就涼州羣官會議給事中韓秀曰此燉國之事非關土之宜愚謂燉煌之位其來久矣雖土鄰強寇而兵人素習縱有竊竊不能爲害若徙就姑臧慮人懷異意或貪留重遷情不願徙引寇內侵深爲國患且燉煌去涼州三千里捨遠就近防制有闕一朝廢置是啟戎心恐醜徒協契侵竊涼土邊役繁興艱難方甚乃從秀議隋

煬帝時遣侍御史韋節司隸從事杜行滿使於西蕃諸國至罽賓得瑪瑙杯王舍城得佛經史國得十舞女獅子皮火鼠毛而還帝復令裴矩於武威張掖間往來以引致之皆啗以厚利令轉相諷諭大業中相率而來朝者三十餘國帝因置西戎校尉以應接之自燉煌西出玉門關涉鄯善北通伊吾千里自伊吾北通車師前部高昌僻千二百里自高昌僻北通車師後部金滿城五百里此其西域之門戶也故漢戊巳校尉更互屯焉伊吾地宜五穀桑麻蒲萄其北又有柳中皆膏腴之地故漢常與匈奴爭車師伊吾以制西域至隋有商胡雜居

勝兵千餘人附於鐵勒人甚驕悍厥田良沃隋末內屬置伊吾郡後又臣突厥唐貞觀四年以頡利破滅遂舉其屬七城來降因列其地爲西伊州同於編戶至武太后如意初武威軍總管王孝傑大破吐蕃復龜茲于闐疎勒碎葉四鎮自是諸國朝貢侔於前代矣

續文

獻通考曰明於西北邊設立甘肅等衛自肅州西七十里爲嘉峪關關外建七衛而哈密在六衛西去肅州不一千五百里本古伊吾廬之地唐之伊州也其北天山與瓦剌界西接火州回回韃靼雜居爲往來之津其主曰安克帖木兒洪武中太祖定陝西命將守嘉峪關永

樂二年諸番遣使貢馬始即其地設哈密赤斤罕東阿
端曲先安定諸衛改封安克帖木兒爲忠順王王卒無
嗣兄子脫脫賜以金印玉帶襲主國事令察諸番向背
凡番使入貢就此譯遣亦斷匈奴右臂意也部下有回
回畏兀兒哈刺灰三種脫脫子孛羅帖木兒成化八年
被其下殺其母努溫答力理國事九年土魯番即唐之吐蕃夷
速檀阿力王入哈密劫王母奪金印部落遂播遷匿苦
峪城或附居肅州亦有隨土魯番去者事聞朝廷命高
陽伯李文右通政劉文往撫比至土魯番去遠王母金
印竟不返自是阿力謂中國易與志頗驕橫阿力王死

子阿黑麻稱速檀未定時王母外孫畏兀兒之種都督
罕慎寄寓肅州甘肅守臣以聞詔歸罕慎襲王爵送入
哈密城弘治初阿黑麻謂罕慎非脫脫族不當嗣誘而
殺之未敢顯言據哈密遣使入貢言罕慎病死且乞封
時兵部尚書馬文升議阿黑麻擅求代王主哈密宜降
璽書切責朝廷從之王母故其渠牙蘭以金印城池來
歸下兵部議會曲先安定王遣使入朝僞稱忠順王裔
遂命詢貢使安定王族誰可主哈密事者舉王姪陝巴
對詔送陝巴入哈密嗣忠順王阿黑麻聞之怒遂擄陝
巴及金印而去時弘治癸丑也先阿黑麻遣寫亦滿速

兒等入貢至是命兵部侍郎張海等領貢使往經畧之
海等至遣哈密夷人以敕往諭不報海以上命修嘉峪
關閉關絕西域諸番貢令彼結怨阿黑麻以攜其黨阿
黑麻復入哈密自稱可汗大掠罕東諸夷已而西去令
頭目牙蘭率番人二百餘據哈密馬文升曰若專示以
恩而不加以威彼終不知畏須用漢陳湯故事懲之
請於上敕巡撫許進總兵劉寧彭清等帥師由南山捷
徑冒險而入阿黑麻聞大兵至先率衆遁惟留牙蘭與
撒他兒領蕃兵數百人登臺自保進至僅斬首六十餘
級而還久之阿黑麻以閉關不得通貢貿易遣使送陝

巴及金印來歸仍封忠順王陝巴死子速檀拜牙郎嗣
為屬夷所逐走土魯番阿黑麻死子速檀滿速兒立遣
火者他只丁等入哈密取金印明年滿速兒亦至哈密
又寇甘肅索幣且挾以許我即獻城及金印已而遣使
歸城印而留速檀拜牙郎不遣已復遣人據哈密來請
幣副使陳九疇調屬夷劫其老營遣人北結瓦刺擣其
巢穴破三城始懼引退嘉靖七年劫我曲先衛人牙木
蘭內侵牙木蘭不從遂擁帳內徙奔肅州乞白城山金
塔寺駐牧因留肅州滿速兒請以哈密易牙木蘭兵部
尚書胡世寧曰牙木蘭反正歸順非納叛比而土魯番

欲甘心牙木蘭以攜貳我屬夷正宜厚牙木蘭以風蠻夷遂留不遣初世寧建議忠順王速檀拜牙郎已歸土魯番雖還哈密亦其屬夷縱使今日有忠順嫡派應立之人朝廷與之金印助之兵糧誰與為守不過一二年復為所據奪不如閉嘉峪關置哈密不問不必再辱王命詰城印以中彼索求之計如彼不肆侵擾則許其通貢或復為寇閉絕之庶不以哈密故疲吾中國之奔命也至是尚書桂萼議哈密勢雖不可興復亦不可廢棄并條甘肅邊事數款上之制曰可遂不用兵哈密是時來降人哈六刺言番酋欲以哈密城與都督米兒黑木

母管理兵部遂請於上許其通貢著為令以三年或五年為期夷使雖多入京止許十二人餘留塞自是哈密入土魯番據矣

西戎總序二

原論漢班固西戎論曰孝武之代圖制匈奴患其兼從西國結黨南羌乃表河西列四郡開玉門通西域以斷匈奴右臂隔絕南羌月氏單于失援自是遠遁而幕南無王庭因文景元默養民五代天下殷富財力有餘士馬強盛故能睹犀布瑇瑁則建珠崖七郡感蒟醬竹杖則開牂柯越巂聞天馬蒲萄則通大宛自是之後萬里

相奉師旅之費不可勝計至於用度不足乃權酒酤筦鹽鐵鑄白金造皮幣算至車船租及六畜民力屈財用竭羣盜並起至於末年遂棄輪臺之地而下哀痛之詔豈非仁聖之所悔哉且西域近有龍堆遠則葱嶺身熱頭痛懸度之阨淮南杜欽揚雄之論皆以為此天地所以界別區域絕外內也書云西戎即序禹就而序之非上威服致其貢物也西域諸國各有君長兵衆分弱無所統一雖屬匈奴不相親附匈奴能得其馬畜旃罽而不能統率與之進退與漢隔絕道里又遠得之不為益棄之不為損盛德在我無取於彼故自建武以來西域

思漢威德咸樂內屬惟其小邑鄯善車師界迫匈奴尚為所拘而其大國莎車于闐之屬數遣使置質願請都護聖上遠鑑古今因時之宜羈縻不絕辭而未許雖大禹之序西戎周公之讓白雉太宗之却走馬義兼之矣亦何以尚茲

考宋范華西域傳論曰西域風土之載前古未聞也漢世張騫懷致遠之畧班超奮封侯之志終能立功西遐羈服外域自兵威之所肅服財賂之所懷誘莫不獻方奇納愛質露頂肘行東向而朝天子故設戊己之官分任其事建都護之帥總領其權先馴則賞贏金而賜龜綬後服則繫頭額而覺北闕立屯田於

膏腴之野列郵置於要害之路馳命走驛不絕於時月
商胡販客日款於塞下其後甘英乃抵條支而歷安息
臨西海以望大秦拒玉門陽關者四萬餘里靡不周盡
焉若其境俗性智之優薄產載物類之區品川河領障
之基源氣節涼暑之通隔梯山棧谷繩行沙度之道身
熱首痛風災鬼難之域莫不備寫情形審求根實至於
佛道神化興自身毒而二漢方志莫有稱焉張騫但著
地多暑溼乘象而戰班勇雖列其奉浮圖不殺伐而精
文善法導達之功靡所傳述余聞之後說也其國則殷
乎中土玉燭和氣靈聖之所降集賢懿之所挺生神迹

詭怪則理絕人區感驗明顯則事出天外而騫超無聞
者豈其道閉往運數開叔葉乎不然何誣異之甚也漢
自楚英始盛齋戒之祀桓帝又修華蓋之飾將微義未
譯而但神明之邪詳其清心釋累之訓空有蕪遣之宗
道書之流也且好仁惡殺蠲敝崇善所以賢達君子多
愛其法焉然好大不經竒譎無已雖鄒衍談天之辨莊
周蝸角之論尚未足以槩其萬一又精靈起滅因報相
尋若曉而昧者故通人多惑焉蓋導俗無方適物異會
取諸同歸措夫疑說則大道通矣

媯羌

漢書曰出陽關自近者始曰婼羌國王號去胡來王
去陽關千八百里去長安六千三百里西接且末隨畜
逐水草不田作仰鄯善且末穀山有鐵自作兵兵有弓
矛服刀劍甲

樓蘭

原杜氏通典曰樓蘭在婼羌西北漢時通焉王理扞泥
城去陽關千六百里東去長安六千一百里戶千五百
七十西北去都護理所千八百五十里至山國千三百
餘里此國山居故名山國西北至車師千九百里地沙鹵寄田仰
穀旁國人隨畜牧逐水草有驢馬多橐駝能作兵器與

婼羌同初漢武帝因張騫之言甘心欲通大宛諸國使
者一歲中多至十餘輩樓蘭姑師當道苦之攻劫漢使
王恢等漢將趙破奴率屬國騎及郡兵擊之虜樓蘭王
遂破姑師於是列亭障至玉門矣樓蘭既降服貢獻匈
奴間發兵擊之於是樓蘭遣一子質漢後貳師將軍擊
大宛便道引兵捕樓蘭王將詣闕簿責王對曰小國在
大國間不兩屬無以自安願徙國居於漢地上直其言
遣歸國樓蘭王死後王立樓蘭國最東垂近漢當白龍
堆之水草常主發導負米擔糧送迎漢使又數為吏卒
所懲艾不便與漢通艾讀曰艾後復為匈奴反間數遮漢使

昭帝遣平樂監傅介子往刺其王懸首北闕下乃立其弟尉屠耆為王更名其國為鄯善王自請天子曰身在漢久今歸單弱而前王有子在恐為所拒國中有伊循城其地肥美願漢遣一將屯田積穀令臣得依其威重於是漢遣司馬一人吏士四十人田伊循以鎮撫之其後置都尉伊循官置始此矣

鄯善

增後魏書曰鄯善國都扞泥城古樓蘭國也去代七千六百里所都城方一里北即白龍堆路至太延初始遣使來獻四年遣其弟素延耆入侍及世祖平涼州沮渠

拉健弟無諱走保燉煌無諱後謀渡流沙遣其弟安周擊鄯善王比龍恐懼欲降會魏使者自天竺罽賓還俱會鄯善勸比龍拒之安周不能尅退保東城後比龍懼率眾西奔且末其世子乃應安周世祖發涼州兵討之其王真達而縛出降詣京師拜交趾公賦役其人比之郡縣

精絕

增漢書曰精絕國王治精絕城去長安八千八百二十里勝兵五百人北至都護治所二千七百二十三里南至戎盧國四日行地阨陁西通杆彌四百六十里

且末

原後魏書曰且末國漢時通焉王治且末城去長安六千八百里戶二百三十西北至都護理所二千二百里北接尉黎丁零東與白提西接波斯精絕南至小宛可三日行地多蒲萄諸果西北流沙數百里夏月有熱風為行旅之患風之欲至老駝先知即鳴而聚立埋口鼻於沙中人每以為候亦將氈蔽鼻口其風迅駛斯須過盡若不防者必致危斃

杆彌

原杜氏通典曰杆彌漢時通焉王理杆彌城去長安九

千三百里戶三千三百東北至都護理所三千五百里南與疎勒東北與龜茲西北與姑墨接西通于闐四百里後漢改其國曰拘彌居寧彌城亦曰寧彌城國順帝永建中為于闐王放前破殺其王興陽嘉初燉煌太守徐由遣疎勒發兵擊破于闐遂更立拘彌王靈帝嘉平中又為于闐所破殺掠殄盡眾纔千口

車師

原杜氏通典曰車師前王後王並漢時通焉前王國一曰前部理交河城水分流繞城下故為號去長安八千一百里戶千五百西南至都護理所千八百里西域長

車師

史及戊巳校尉並理於此去燉煌十三日行後王國理
務塗谷即今蒲城今北庭府蒲類縣也去長安八千九百里戶六百西
南至都護理所千二百三十餘里北與匈奴接宣帝地
節二年遣侍郎鄭吉校尉司馬喜將免刑罪人田渠黎
積穀欲以攻車師至秋收穀吉喜發城障諸國兵共擊
車師攻交河城破之王尚在北石城未得會吉食盡歸
渠黎田秋收後更往攻石城王乃輕騎奔烏孫吉還田
渠黎及車師益積穀以安西國侵匈奴匈奴大臣皆曰
車師地肥美近匈奴使漢得之多田積穀必害我國不
可不爭也遣騎來擊吉吉將田士卒保車師城匈奴圍

城數日乃解吉上書車師去渠黎千餘里間以山河北
近匈奴漢兵在渠黎者勢不能相救願益田卒於是故
車師太子軍宿在焉者者立以為王盡徙車師國人令
居渠黎遂以車師故地與匈奴車師王得近漢田官與
匈奴絕亦安樂親漢其後置戊巳校尉屯田車師故地
增北史曰後魏太武初遣使朝獻初沮渠無諱鳩集
遣人破車師國真君十一年車師王車夷落遣使琢進
辭直上書曰臣亡父僻處塞外仰慕天子威德遣使奉
獻不空於歲天子降念賜遣甚厚及臣繼立亦不缺常
貢天子垂矜亦不異前世敢緣至恩輒陳私懇臣國自

無諱攻擊經今八歲人民饑荒無以存活賊今攻臣甚急臣不能自全遂捨國東奔三分免一即日已到焉者東界思歸天關辛垂賑救於是下詔撫慰之正平初遣子入侍自後每使朝貢不絕

高昌

增北史曰高昌者車師前王之地東西二百里南北五百里四面多大山地勢高敞人庶昌盛因名高昌亦云有漢時高昌壘故以為號東去長安四千九百里漢西域長史及戊己校尉並居於此晉以其地為高昌郡張軌呂光沮渠蒙遜據河西皆置太守以統之 文獻通

考曰後魏文成帝末其地又為蠕蠕所并立闕伯周為王孝文太和五年高車主阿伏至羅殺闕王立燉煌人張孟明後孟明為國人所殺立馬儒為王以鞏顧禮麴嘉為左右長史儒通使後魏請內屬人皆戀土不願東徙相與殺儒立嘉其都城周千八百四十步於坐室畫魯哀公問政孔子像國內有城十八置四十六鎮官有令尹交河公田地公皆其王子也文字同華夏有毛詩論語孝經歷代子史集置學官子弟以相教授地多石磧氣候溫暖與益州相似穀麥再熟宜蠶多五果有草名羊刺其上生蜜味甚佳赤鹽如朱白鹽如玉取以為

枕貢之中國多蒲萄酒俗事天神兼信佛法又有草實如繭中絲如細纒名白疊子國人織以為布交市用焉國北有赤石山山北七十里有貪汗山夏有積雪此山之北鐵勒界也北史曰熙平中仍求內徙遣使朝貢詔曰卿地隔關山境接荒漠頻請朝援徙國內遷雖來誠可嘉於理未協何者彼之氓庶是漢魏遺黎自晉氏不綱因難播越成家立國積世已久惡徙重遷人懷戀舊今若動之恐異同之變爰在肘腋不得便如來表也止光元年又遣使奉表自以邊遐不習典誥求借五經諸史并請國子助教劉燮以為博士許之隋大業五年

嘉孫伯雅來朝因從擊高麗還尚宗室女華容公主文獻通考曰唐貞觀中其王文泰與西突厥連結諸國朝貢者路出高昌擁絕之太宗謂其使曰高昌朝貢脫略我使至彼文泰云鷹飛於天雉竄於蒿猫遊於堂鼠安於穴各得其所豈不快耶明年當發兵擊汝國十四年拜侯君集為交河道大總管討之文泰謂左右曰曩吾入朝見秦隴北城邑蕭條非有隋比今伐我兵多則輸糧不逮若下三萬我能制之度磧疲鈍以逸待勞臥收其弊耳及王師至悸駭無計發病死子智盛降乃以其地為西州以交河城為交河縣始昌城為天山縣田

北城爲柳中縣東鎮城爲蒲昌縣高昌城爲高昌縣初
西突厥遣其葉護屯兵於可汗浮圖城與高昌爲影響
至是懼而來降以其地爲庭州并置蒲類縣每歲調內
地更發千人鎮遏焉褚遂良諫曰高昌誅滅威動四夷
然自王師始征河西供役飛米轉芻十室九匱五年未
可復今又歲遣屯戍行李萬里去者資裝使自營辦賣
菽粟傾機杼道路死亡尚不可計所遣罪人始於犯法
終於惰業無益行陳復有亡命官司捕逮株蔓相牽有
如張掖酒泉塵飛烽舉豈得高昌一乘一卒及事乎必
發隴右河西耳然則河西爲我腹心高昌他人手足也

何必耗中華事無用宜擇高昌可立者立之召首領悉
還本土長爲藩翰中國不擾書奏不省麴氏傳國九世
百三十四年而亡 北史曰先是其國童謠云高昌兵
馬如霜雪漢家兵馬如日月日月照霜雪回首自消滅
文泰使人捕其初唱者不能得 文獻通考曰安史之
亂其地陷沒復自爲國語訛亦曰高敞然其地頗有回
鶻故亦謂之回鶻宋乾德三年西州回鶻可汗遣僧法
淵獻佛牙琉璃器琥珀盞太平興國六年其王始稱西
州外生師子王阿厮蘭漢遣都督麥索温來獻五月遣
供奉官王延德等使高昌還敘其行程來上云初自夏

州歷玉亭鎮次歷黃羊平度沙磧無水行人皆載水凡
二日至都囉囉族漢使過者遺以財寶謂之打當次歷
第女喝子族族臨黃河以羊皮為囊吹氣實之浮於水
或以橐駝牽木棧而渡次歷茅女王子開道族行入六
窠砂深三尺馬不能行行者皆乘橐駝不育五穀砂
中生草名登相收之以食次歷樓子山無居人行砂磧
中以日為占旦則背日暮則向日日中則止夕行望月
亦如之歷卧梁劾特族地有都督山唐回鶻之地次歷
大蟲太子族族接契丹界人衣尚錦繡器用金銀馬乳
釀酒飲之亦醉次歷屋地因族蓋達于于越王子之子

次至達于于越王子族此九族達靺鞨中尤尊者次歷拽
利王子族有合羅川唐回鶻公主所居之地城基尚在
有湯泉傳云契丹舊為回鶻牧牛回鶻徙甘州契丹達
靺鞨遂各爭長攻戰次歷阿墩族經馬駿山望鄉嶺嶺上
石龕李陵題字處次歷格囉美源西方百川所會極望
無際鷗鷺鳧雁之類甚眾次至托邊城亦名李僕射城
城中首領號通天王次歷小石州次歷伊州州將陳氏
其先自唐開元二年領州凡數十世唐時詔敕尚在地
有野蠶生苦參上可為錦帛有羊尾重者三斤小者一
斤肉如熊白而甚美又有礪石剖之得賓鐵謂之喫鐵

石又生胡桐樹經雨即生胡桐律次歷益都次歷納職城在大患鬼魅磧之東南望玉門關甚近無水草載糧以行凡三日至鬼谷口避風驛用本俗法設祭出詔神禦風風乃息凡八日至驛田寺高昌聞使至遣人來迎次歷地名寶莊又歷六種乃至高昌高昌即西州也其地南距于闐月距大食波斯西距西天步露沙雪山葱嶺皆數千里地無雨雪而極熱每盛暑居人皆穿地爲穴以處飛鳥羣萃河濱或起飛則爲日氣所爍墜而傷翼屋宇覆以白堊開寶三年雨及五寸即廬舍多壞有水出金嶺導之周繞國城以溉田園作水磴地產五

穀惟無蕎麥貴人食馬餘食羊及鳧雁樂多琵琶箏篪出貂鼠白氎繡文花蕊布俗好騎射婦人戴油帽謂之蘇幕遮用開皇七年曆以三月九日爲寒食餘二社冬至亦然以銀或鍮石爲筒貯水激以相射或以水相潑爲戲謂之壓陽氣去病好遊賞行者必抱樂器佛寺五十餘區皆唐朝所賜額寺中有大藏經唐韻玉篇經音等居民春月多羣聚遨樂於其間遊者馬上持弓矢射諸物謂之攘災有敕書樓藏唐太宗明皇御札詔敕緘鎖甚固復有摩尼寺波斯僧各持其法佛經所謂外道者也所統有南突厥北突厥大衆馭小衆馭樣磨割祿

黠戛司末蠻格哆族豫龍族之名甚衆國中無貧民絕
食者共賑之人多壽考率百餘歲時四月師子王避暑
於北庭以其舅阿多于越守國先遣人致意於延德曰
我王舅也使者拜我乎延德曰持朝命而來禮不當拜
復問曰見王拜乎延德曰禮亦不當拜阿多于越復數
日始相見然其禮頗恭師子王邀延德至其北庭歷交
河州凡六日至金嶺口寶貨所出又兩日至漢家寨又
五日上金嶺過嶺即多雨雪嶺上有龍堂刻石記云小
雪山也嶺上有積雪行人服毛罽度嶺一日至北庭憩
高臺寺其王烹羊馬以具膳尤豐潔地多馬王及王后

太子各養馬牧放於平川中彌亘百餘里以毛色分別
為羣莫知其數北庭川長廣數千里鷹鷂鶻鶻之所生
多美草下生花砂鼠大如鸚鵡禽捕食之其王遣人來
言擇日以見使者願無訝其淹久至七日見其王及王
子侍者皆東向拜受賜旁有持磬者擊以節拜王聞磬
聲乃拜既而王之子女親屬皆出羅拜以受賜遂張樂
飲宴為優戲至暮明日泛舟於池中池四面作鼓樂又
明日遊佛寺曰應運泰寧之寺貞觀十四年造北庭北
山中出礪砂山中常有煙氣涌起而無雲霧至夕光焰
若炬火照見禽鼠皆赤礪砂者著木底鞵若皮為底

者即焦下有穴生青泥出穴外即變為砂石土人取以治皮城中多樓臺卉木人白晳端正性工巧善冶金銀銅鐵為器及攻玉善馬直絹一匹其駑馬充食者纜直一丈貧者皆食肉西抵安西即唐之西境七月令延德先還其國其王九月始至亦聞有契丹使來使缺唇以銀葉蔽之謂其王云聞漢遣使入達靺而道出王境誘王窺邊宜早送至達靺無使久留因云高敞本漢土漢使來覘視封疆將有異圖王當察之延德偵知其語因謂王曰契丹素不順中國今乃反間我欲殺之王固勸乃止自六年五月離京七年四月至高昌所歷以詔賜

諸番君長襲衣金帶繒帛八年春與其謝恩使凡百餘人復循舊路而還雍熙元年四月至京師延德初至達靺之境頗見晉末陷沒者子孫咸相率遮迎獻飲食問其鄉里親戚意甚悽感留旬日不得去 續文獻通考曰元時號畏兀兒地太祖平西域置達魯花赤監治之

火州

增續文獻通考曰火州地在嘉峪關外東距哈密西連亦力把力南抵于闐北接瓦剌自東南至肅州一月程即漢車師前王治交河城即唐交河郡縣也後為回鶻所據稱火州以其山色如火也明永樂十二年吏部員

外郎陳誠至其國歸言風物蕭條市里居民僧堂過半亦皆零落東有荒城故址云古高昌國漢西域長史戍已校尉並居焉其俗多匈奴烏孫事神信佛好騎射其產馬橐駝胡桃蒲萄蠶砂鼠磧砂胡桐律刺密鹽白氈布鑛鐵陰牙角速霍角阿魏

土魯番

增象胥錄曰土魯番一名土爾番在火州西百里漢車師前王地車師前王居交河城唐置西州交河郡且析以為縣有安樂城方一二里地曠衍四面皆山城西二十里崖兒城可二里居民百餘家相傳故交河縣治永

樂十一年遣吏部員外郎陳誠使西域十三年土魯番遣使隨誠入貢授都督都指揮等官歷後朝貢不絕其俗候暖鮮雨雪宜麻麥饒瓜果羊馬室居奉佛多僧寺陳誠使還言其國城西北百里有靈山最大土人言此十萬羅漢涅槃處也近山有高臺旁寺擁石泉林木從此入山行二十里至一峽南有小土屋從屋南登山坡得石屋奉小佛像五前有池池東山石青黑遠望紛如毛髮土人言此十萬羅漢洗頭削髮處也綠峽東南行六七里登高崖崖下小山纍纍峰巒秀削其下白石成堆似玉輕脆不可握堆中有若人骨色澤明潤土人言

此十萬羅漢靈骨也又東下石崖得石笋迸出如手足
稍南至山坡石復瑩潔如玉土人言此辟支佛涅槃處
也周行羣山約二十餘里悉五色砂石光焰灼人四面
峻壑窮崖天巧奇絕然寡草木亦鮮鳥獸自誠使後土
魯番漸張旁齧諸國及關外七衛地廣人庶眎昔懸絕
矣

柳陳

增象胥錄曰柳陳一名魯陳亦曰柳城漢名柳中延光
二年以班勇為西域長史將弛刑士五百人西屯柳中
遂破車師即其地也唐平高昌置柳中縣屬西州交河

郡去哈密千里中經大川砂磧無水草馬牛過此輒死
大風倏起人馬相失白日鬼魅迷行人謂之旱海出川
西行至流砂河上有小岡云風捲浮砂所積道北火焰
山色如火城方二三里四面多田園流水環繞灌木苓
蔚候暖俗醇宜稼麥麻豆有小蒲萄甘甜無核名鎖鎖
葡萄人二種回回男子削髮戴小單刺婦女白布裹頭
畏兀兒男子椎髻婦人蒙阜布垂髻於額

黑婁

增象胥錄曰黑婁在嘉峪關西近土魯番世締好黑婁
貢從土魯番入其地男女山水草木禽獸並黑宣德七

年始遣使朝貢

滑國

南史曰滑國車師之別種也漢永建元年八滑從班勇北擊有功為後部親漢侯自魏晉以來不通中國梁天監十五年其王厭帶夷栗陀始遣使獻方物普通元年獻黃獅子白貂裘波斯錦等物魏之居代都滑猶小國屬蠕蠕後稍强大征其旁國盤盤罽賓龜茲疎勒姑墨于闐等國開地千里土地温暖多山川少樹木有五穀國人以麩及羊肉為糧其獸有獅子兩脚駱駝野驢有角人善騎射女人頭上刻木為角長六寸以金銀飾

之無城郭氈屋為居東向開戶其王坐金牀隨太歲轉無文字以木為契每日則出戶祀神而後食父母死其子截一耳葬訖即吉其言語待譯而後通又有阿跋檀周古枯胡密丹等國並滑旁小國也普通元年隨滑入貢

白題

南史曰白題王姓支名史稱毅其先蓋匈奴之別種漢灌嬰與匈奴戰斬白題騎一人是也在滑國東去滑六日行西極波斯地出粟麥瓜果食物畧與滑同梁普通三年遣使貢方物

二百里隋西域圖云白山一名阿羯山東去長安七千五百里戶七千南與精絕東南與且末西南與杆彌北與烏孫西與姑墨接能鑄冶俗有城郭東至都護理所烏壘城四百里烏壘戶百十與都護同理其南三百里至渠黎渠黎城都尉一人戶百三十東北與尉犁東南與且末南與精絕接昭帝田輪臺與渠黎地皆相連也
增晉書曰晉武帝時其王遣子入侍惠懷未符堅遣其將呂光伐之其王白純距境不降光進軍討平之立其後白震為王北史曰城方五六里其國東有輪臺即漢李廣利所屠者其南三百里有大河東流號計戍

水即黃河也俗性多淫置女市收男子鐵以入官土多孔雀羣飛山谷間人取食之孳乳如雞鶩其國西北大山中有如膏者流出成川行數里入地如鯽鮠甚臭齒髮落者服之能令更生癘人服之皆愈周保定元年其王遣使來獻隋大業中遣使朝貢方物舊唐書曰唐貞觀四年獻馬太宗賜璽書撫慰然臣西突厥郭孝恪伐焉耆龜茲遣兵影助自是職貢頗闕帝伐之立其王之弟葉護始徙安西都護於其都統于闐碎葉疏勒號四鎮高宗復棄四鎮移安西依舊西州城堡並為賊陷長壽元年王孝傑破吐蕃復四鎮地後置安西都護府

用兵三萬鎮之遠踰沙磧甚為百姓所苦言事者請棄之則天不許 宋史曰宋自天聖至景祐入貢者五紹聖三年使大首領阿連撒羅等以表章及玉佛至洮西熙河經畧使以其罕通使請令於熙秦等州博買而估所齎物價答賜遣還從之

焉者

原杜氏通典曰焉者漢時通焉王理員渠城員于君反在白山之南七十里去長安七千三百里戶四千西南至都護理所四百里南去尉犁百里北與烏孫接東去交河城九百里西去龜茲九百里皆沙磧其國近海水多魚

鹽蒲葦之利四面有大山道險阨易守海水曲入四山之內周匝其城三十餘里後漢明帝永平末有戶萬五千與龜茲共攻沒都護陳睦至和帝元光六年都護班超發諸國兵討之殺其王超乃立焉者佐侯元孟為王至安帝時西域背叛延光中超子勇為西域長史復討定之 **增**晉書曰武帝太康中其王龍安遣子入侍安夫人妊身十二月剖脇生子曰會立為世子會少而勇傑安病篤謂會曰我嘗為龜茲王白山所辱汝能雪之乃吾子也及會立襲滅白山遂據其國遣子熙歸本國為王會有膽氣籌略遂霸西域葱嶺以東莫不率服其

後張駿遣沙州刺史楊宣率衆疆理西域宣以部將張
植爲前鋒熙率衆先要之於遮留谷植將至或曰漢祖
畏於柏人岑彭死於彭土今谷名遮留殆將有伏單騎
嘗之果有伏發植擊敗之進據尉犁熙降於宣 北史
曰隋大業中其王龍突騎支遣使貢方物 唐書曰唐
貞觀六年龍突騎支始遣使來朝自隋亂磧路閉故西
域朝貢皆由高昌突騎支請開大磧道以便行人帝許
之高昌怒大掠而去十四年侯君集破高昌突騎支引
兵佐唐其後朝貢遂闕安西都護郭孝恪擊之執突騎
支以粟婆準攝國事焉者又立從兄薛婆阿那支爲王

執粟婆準送龜茲爲其所殺阿史那社尒討龜茲擒之
立婁伽利爲王以修職貢

于闐二

原杜氏通典曰于闐漢時通焉都葱嶺之北二百餘里
去長安九千七百里戶三萬二千東北至都護理所三
千九百里南與婁羌接北與姑墨接東北去龜茲千四
百里東去鄯善千五百里西通皮山國四百里東去朱
俱波國千里西北至疎勒國千五百里其國之西水皆
西流注西海其東水東流注鹽澤 **增**唐書曰國有阿
耨達山據漢書河源出焉後漢建武末莎車王賢疆盛

邊表 于闐 四

攻并于闐徙其主俞林為驪歸王永平中于闐將休莫
霸反自立死兄子廣德立後遂滅莎車其國轉盛從精
絕西北至疏勒十三國皆服從而鄯善王亦始強盛自
是南道自葱嶺以東惟此二國為大順帝時遣侍子詣
闕貢獻元嘉中王敬為長史斬其王建于闐將輸燹等
斬敬自立國人殺之立建子安國焉梁武帝時凡四遣
使通江左獻方物隋大業中頻遣使朝貢其王姓王字
早示門練錦帽金鼠冠髮不令人見俗言見王髮年必
儉俗重佛法寺塔僧尼甚眾王尤信尚設齋日必親自
灑掃饋食城南五十里有贊摩寺即昔羅漢比丘盧旃

為其王造覆盆浮圖之所石上有辟支佛跣處雙跡猶
存西有比摩寺云是老子化胡成佛之所自高昌以西
諸國人深目高鼻惟此一國貌類華夏城東二十里有
大水北流號樹枝水即黃河也一名計式水城西五十
里亦有大水名達利水與樹枝水會俱北流其後併有
漢戎盧杆彌渠勒皮山五國故地其居曰西山城勝兵
四千人有玉河國人夜視月光盛處必得美玉王居繪
室俗機巧言迂大然貌恭謹相見皆跪以木為筆玉為
印凡得問遺書戴於首乃發之自漢武帝以來中國詔
書符節玉王傳以相授人喜歌舞工紡績西有沙磧鼠

大如蝟色類金出入羣鼠為從初無桑蠶丐鄰國不肯
 出其王即求婚許之將迎乃告曰國無帛可持蠶自為
 衣女聞置蠶帽絮中關守不敢驗自是始有蠶女刻石
 約無殺蠶蛾飛盡得治繭唐貞觀六年遣使入獻玉帶
 安史之亂絕不復至矣 文獻通考晉天福中其王李
 聖天自稱唐宗屬遣使來貢高祖遣供奉官張匡鄴高
 居誨等入其國冊聖天為大寶于闐國王宋建隆二年
 聖天遣使貢圭一以玉為柙使者言國城東有白玉河
 西有綠玉河次西有烏玉河源出崑崙山去國城西千
 三百里每歲秋水小後國人取玉於河謂之撈玉官取

後方許私取大中祥符二年其國黑韓王遣回鶻羅廝
 温等以方物來貢上詢其在路幾時去此幾里對曰涉
 道一年晝行暮息不知里數昔時道路嘗有剽劫今道
 路清謐行旅如流願遣安撫遠俗上曰路遠命使益以
 勞費爾國今降詔書汝齋往亦與命使無異也嘉祐八
 年十一月以其國王為特進歸忠保順砮鱗黑韓王于
 闐謂金翅鳥為砮鱗黑韓蓋可汗之訛使言其王乞此
 號云元豐四年遣蕃部阿辛上表稱于闐國僕儼有福
 力知文法黑汗王書與東方日出處大世界田地主漢
 家阿舅大官家大略云路遠傾心相向前三遣使入貢

未回重復數百言董氈使導至熙州譯其辭以聞詔前
三輩使人皆已朝見錫賚遣發賜敕書諭之 續文獻
通考遼聖宗統和開泰間俱入貢金時遣滿刺哈撒木
丁等貢玉璞明永樂間打魯哇亦不刺入貢其產玉胡
錦獨峰駝乳香礪砂硃珊瑚翡翠木香琥珀花蕊布名
馬膞膞臍金星石水銀阿魏安息香雞舌香葡萄獅子

于闐一

增月光盛而美玉生

王髮見而凶年至俱見

于闐三

增記晉高居誨使于闐記曰自靈州過黃河行三十里

始涉沙入党項界曰細腰沙神樹沙至三公沙宿月氏
都督帳自此沙行四百餘里至黑堡沙沙尤廣遂登沙
嶺沙嶺党項牙也其酋曰捨崖天子渡白亭河至涼州
涼州西行五百里至甘州甘州回鶻牙也其南山百餘
里漢小月氏之故地也有別族號鹿角山沙陞云朱耶
氏之遺族也自甘州西始涉磧磧無水載以行甘州人
教晉使者作馬蹄木澀四窟馬蹄亦鑿四窟而綴之駝
蹄則包以鼈皮乃可行西北五百里至肅州渡金河西
百里出天門關又西百里出玉門關經吐蕃男子冠中
國帽婦人辮髮戴瑟瑟云珠之好者一珠易一良馬西

至瓜州沙州二州多中國人聞晉使者來其刺史曹元深等郊迎問使者天子起居瓜州南十里鳴沙山云冬夏殷殷有聲如雷云禹貢流沙也又東南十里三危山云三苗之所竄也其西渡都鄉河曰陽關沙州西曰仲雲族其牙帳居胡盧磧云仲雲者小月氏之遺種也其人勇而好戰瓜沙之人皆憚之胡盧磧漢明帝時征匈奴屯田於伊吾盧蓋其地也地無水而嘗寒多雪每天煖雪消乃得水臣鄴等西行入仲雲界至大屯城仲雲遣宰相四人都督三十七人候晉使者臣鄴等以詔書慰諭之皆東向拜自仲雲界西始涉鹽磧無水掘地得

濕沙人置之甕以止渴又復渡陷河伐檉置水中乃渡不然則陷又西至紺州紺州于闐所置也在沙州西南云去京師九千五百里矣又行二日至安軍州遂至于闐聖天衣冠如中國其殿皆東向曰金冊殿有樓曰七鳳樓以蒲萄為酒又有紫酒青酒不知其所釀而味尤美其食糲沃以蜜粟沃以酪其衣布帛有園圃花木俗喜鬼神而好佛聖天居處嘗以紫衣僧五十人列侍其年號同慶二十九年其國東南曰銀州盧州涪州其南千三百里曰玉州云漢張騫所窮河源出于闐而山多玉者此山也

疏勒

原杜氏通典曰疏勒漢時通焉王理疏勒城去長安九千三百里戶千五百都白山南百餘里東至都護理所二千二百里南有河西帶葱嶺亦名雪山在國西北百餘里河所出東去龜茲千五百里西去撥汗國撥汗一名判汗千里當大月氏大宛康居道南去莎車五六百里去朱俱波八九百里隋史云東北去突厥牙帳千餘里東南去瓜州四千六百里在于闐國北千五百里耿恭為戊己校尉屯車師後王金蒲城為匈奴所攻恭引眾入疏勒城中乏水穿井十五丈不得水恭整衣服向井再拜為吏士禱飛泉涌出賊遂退

增北史曰後魏文成末其王遣使送釋迦牟尼佛袈

裝一長二丈餘帝以其審是佛衣當有靈異置於猛火之上經日不燃觀者悚駭其人文身碧瞳手足皆六指產子束頭使褊非六指者即不育 **原**文獻通考曰其王姓裴氏自號阿摩支唐貞觀十三年與朱俱波甘棠貢方物開元十六年遣大理正喬夢松等冊其君安定為疏勒王

烏孫

原杜氏通典曰烏孫漢時通焉大昆彌理赤谷城

烏孫其形

最異青眼赤鬚狀類獼猴其國謂王曰昆彌亦曰昆莫去長安八千九百里戶十

三萬東至都護理所千七百里西至康居蕃內地五千
里東與匈奴西北與康居西與大宛南與城郭諸國接
本塞地也 **增**文獻通考曰地莽平多雨寒山多松栢
無田作種樹隨畜逐水草與匈奴同俗國多馬富人至
四五千匹民剛惡貪很多寇盜最為強國 **原**杜氏通
典曰張騫言烏孫本與大月氏共在燉煌間今烏孫強
大可厚賂招令東居故地妻以公主以制匈奴武帝即
位令騫齎金幣往昆莫於是發使獻馬願尚公主元封
中遣江都王建女細君為公主以妻焉公主別埋宮室
而居歲時一再與昆莫會置酒飲食昆莫年老語言不

通公主悲愁自作歌以述意天子聞而憐之昆莫死孫
岑陬立岑陬者官號也名軍須靡公主死漢復以楚王
戊之孫解憂為公主妻之岑陬死季父子翁歸靡立號
曰肥王復尚解憂公主宣帝初公主及昆彌翁歸靡上
書言匈奴連歲侵擊欲發國中精兵自給人馬五萬騎
盡力擊匈奴唯天子出兵以救本始三年漢發十五萬
騎五將軍分道並出遣校尉常惠持節護烏孫兵昆彌
將五萬騎從西方入至匈奴右谷蠡王庭 谷音鹿 蠡音黎獲四
萬級馬牛羊驢橐駝七十餘萬宣帝時都護鄭吉請分
烏孫為大昆彌後段會宗為都護時烏孫兵圍之驛騎

上書願發城郭燉煌兵以自救丞相王商大將軍王鳳及百僚議數日不決上召陳湯問對曰臣以為此必無可憂夫胡兵五而當漢兵一何者兵刃朴鈍弓弩不利今聞頗得漢巧然猶三而當一又兵法曰客倍而主人半然後敵今烏孫人眾不足以勝會宗惟陛下勿憂且兵輕行五十里重行三十里今會宗發城郭燉煌歷時而至所謂報讐之兵非救急之用也瓦合不能久攻不過五日當有吉語聞居四日軍書至言已解會宗招還亡畔安定之

烏孫二

續文獻通考曰遼太祖時嘗來貢

增夫人持節

公主學琴

漢書楚王侍者馮嫫能史書習事嘗持節為公主行賞諸

國敬信之號曰馮夫人宣帝徵馮夫人錦車持節詔焉又曰宣帝時烏孫公主遣女至京學鼓琴

烏孫三

增歌漢烏孫公主悲愁歌曰吾家嫁我兮天一方遠託

異國兮烏孫王穹廬為室兮旃為牆以肉為食兮酪為

漿居常土思兮心內傷願為黃鵠兮歸故鄉

悅般

增北史曰悅般國在烏孫西北其先匈奴北單于之部

落為漢車騎將軍竇憲所逐北單于度金微山西走康

居其羸弱不能去者住龜茲北地方數千里眾可二十

洪鑑類考卷二百三十一
十二
餘萬涼州人猶謂之單于王其風俗言語與高車同而其人清潔剪髮齊眉以篋餽塗之昱昱然光澤日三澡漱然後飲食其國南界有大山山傍石皆焦鎔流地數十里乃凝堅人取以為藥即石硫黃也與蠕蠕結好其王嘗入蠕蠕國欲與大檀相見入其界見其人不浣衣不綰髮婦人口舐器物王謂其從臣曰汝曹誑我入此狗國中乃馳還大檀追之不及自是相仇討魏真君九年遣使朝獻并送幻人稱能割人喉脈令斷擊人頭令骨陷皆血出或數升或盈斗以草藥納其口中令嚼咽之須臾血止養瘡一月復常又無痕世祖疑其虛乃取

死罪囚試之皆驗云中國諸名山皆有此草乃使人受其術而厚遇之又言其國有大術者蠕蠕來抄掠術人能作霖雨盲風大雪及行潦蠕蠕凍死漂亡者十二三是歲再遣使朝貢求與官軍東西齊契討蠕蠕太武嘉其意命以淮南王他為前鋒仍詔有司以其鼓舞之節施於樂府自後每使朝貢

姑墨

原杜氏通典曰姑墨漢時通焉王理南城去長安八千一百里戶三千五百東至都護理所千里南至于闐馬行十五日北界接烏孫

新唐書曰自龜茲西羸六

百里踰小砂磧有跋祿迦小國一曰亟墨即漢姑墨國
橫六百里縱三百里風俗文字與龜茲同言語少異西
三百里度石磧至陵山葱嶺北原也水東流春夏山谷
積雪

温宿

原杜氏通典曰温宿漢時通焉王理温宿城去長安八
千三百餘里戶二千二百東至都護理所二千三百餘
里西至尉頭三百里北至烏孫赤谷六百餘里

烏秣

原杜氏通典曰烏秣漢時通焉王理烏秣城去長安萬

里戶五百東北至都護理所四千九百北與子合蒲黎
西與難兜接 **考**文獻通考曰其國後魏又通謂之於
摩國

難兜

原杜氏通典曰難兜漢時通焉去長安萬一百里戶五
千東北至都護理所二千八百里西南至罽賓三百里
南與婁羌北與休屠西與大月氏接

西夜

考漢書曰西夜國王號子合王治呼犍谷去長安萬二
百五十里勝兵千人東與皮山西南與烏秣北與莎車

邊塞部

增補通典卷一百一十二

難兜西夜悉居皮山

西與蒲犁接蒲犁及依耐無雷國皆西夜類也其種類
羌氏行國隨畜逐水草而子合土地出玉石

悉居半

後魏書曰悉居半國故西夜也在于闐西太延初遣
使來獻自後貢使不絕

皮山

漢書曰皮山王治皮山城去長安萬五千里勝兵五
百人西南至烏秣國千三百四十里南與天竺接北至
姑墨千四百五十里西南當罽賓烏弋山離西北通莎
車三百八十里

蒲山

後魏書曰蒲山國故皮山國也居皮城在于闐南其
國西南三里有凍凌山後役屬于闐

烏弋山離

漢書曰烏弋山離國去長安萬二千二百里不屬都
護戶口多大國也東北至都護治所六十日行東與罽
賓北與樸桃西與犁靬條支接行可百餘日至條支

大宛

杜氏通典曰大宛漢時通焉王理貴山城去長安萬
二千五百里戶萬東至都護理所四千呈北至康居于

閼城千五百里西南至大月氏七百里北與康居南與
大月氏接

石久者數十年不敗人嗜酒馬嗜苜蓿

曰多善馬汗血言其先天馬子

皆汗血因號為天馬子始張騫為武帝言之帝遣使者

持千金及金馬以講宛善馬宛王以漢絕遠大兵不能

至遂殺漢使於是太初元年拜李廣利為貳師將軍期

來二歲至燉煌士卒存者十不過一二帝怒其不尅使

遮玉門不許入貳師因留屯燉煌又遣貳師率六萬人

至貳師取善馬率數萬人至其境攻郁城不下引還往

負私從者不與焉牛十萬馬三萬匹驢橐駝萬數天下

騷然益發戍甲卒十八萬置居延休屠

酒泉貳師至宛宛人斬王無寡首獻焉漢軍取其善馬

數十匹中馬以下牝牡三千匹而立宛貴人昧蔡為王

約歲獻馬二匹遂採葡萄苜蓿種而歸

子以馬多益種葡萄苜蓿離宮館旁極望焉

考曰其人皆深目多髭鬚善賈其俗貴女人女子所言

丈夫乃決正其地無絲漆不知鑄器及漢亡卒降教鑄

作兵器焉隋時蘇對沙那國即漢大宛也

洛那

邊塞部

西域傳卷之二十一

洛那哈烈

五

增北史曰洛邠國故大宛國也都貴山城在疏勒西北
太和三年遣使獻汗血馬

哈烈

增續文獻通考曰哈烈在肅州之西相去一萬一千餘
里東北至撒馬兒罕一千四百里即漢之大宛也其地
俱平川四面大山沙哈魯國人尊之為速魯檀猶華言
君王也東有俺都淮八刺墨等城皆隸焉俗衣服喜鮮
潔色尚白有喪易以青國主居窗壁以金銀瑟瑟為飾
富家居室服用頗同國主禮儀簡畧君臣相見但行跪
禮無刑法有罪罰錢而已坊市不設斗斛但用權衡食

亦無七箸惟以手取婚室多以姊妹謂為至親死無棺
槨以布囊裹屍瘞之國有學舍以居遊學之士無正朝
不用甲子以七日為一周擇日用事則以第一日名阿
啼納為上古凡拜天聚會用之酒禁甚嚴修行者多不
飲恐褻天也其產亦有金銀銅鐵珊瑚琥珀珠水晶翡
翠名馬後狴織烏毳為鎖伏紋如紈綺又有花毯極細
密色久不變食物有葡萄巴旦杏明永樂七年朝貢正
統二年貢馬玉石

莎車

原杜氏通典曰莎車漢時通焉理莎車城去長安九千

邊塞部

卷一百一十五

莎車

六

九百里戶二千三百東北至都護理所四千七百里西
去疏勒五百里西南至蒲犁七百里宣帝時莎車王呼
屠徵殺漢使者約諸國叛漢會衛侯馮奉世使大宛以
便宜發諸國兵擊殺之傳其首詣長安諸國悉平威振
西域奉世至大宛大宛聞其斬莎車王敬之異於他使
得其名馬象龍而還馬形似龍帝甚悅下議封奉世少府蕭
望之以奉世擅制發諸國兵雖有功效不可以為後法
即封奉世關內侯後奉使者利以奉世為比爭遂發兵
要功萬里之外為國家生事於夷狄漸不可長不宜受
封帝善其議以奉世為光祿大夫元帝時奉世死後二

年西域都護甘延壽以誅鄯音質支單于封為列侯於是
杜欽上疏追訟奉世前功曰前莎車王殺漢使者約諸
國背叛而奉世以便宜發兵誅莎車王策定城郭功施
邊境議者以奉世奉使有指春秋之義三遂事漢家之
法有矯制故不得侯今匈奴鄯支單于殺漢使者三保
康居都護延壽發城郭兵屯田吏士四萬餘人以誅斬
之封為列侯臣愚以為比罪則鄯支薄量敵則莎車眾
用師則奉世寡制勝則奉世多於邊境居安慮危則延
壽為禍於國家深其違命而擅生事同延壽則割地封
而奉世獨不錄臣聞功同賞異則勞臣疑願下有司議

邊塞部

綱鑑類纂卷一百三十七

莎車

七

帝以先帝時事不復錄 **增** 文獻通考曰匈奴因王莽之亂畧有西域唯莎車王延強不附屬元帝時嘗為侍子長於京師慕樂中國亦復參其典法常敕諸子當世奉漢家不可負也延死子康代立檄書河西問中國動靜自陳思慕漢家河西大將軍竇融承制立康為漢莎車建功懷德王西域大都尉五十五國皆屬焉康死弟賢代立攻破拘彌西夜國皆殺其王而立其兄康兩子為拘彌西夜王十七年遣使奉獻請都護天子以問大司空竇融以為賢父子兄弟相約事漢款誠又至宜加號位以鎮安之帝乃因其使賜賢西域都護印綬及車

旗黃金錦繡燉煌太守裴遵不可詔書收還都護印綬更賜賢以漢大將軍印綬賢由是始恨而猶詐稱大都護移書諸國諸國悉服屬焉號賢為單于賢浸以驕橫數攻龜茲諸國諸國恐懼二十一年冬車師前王鄯善焉耆等十八國俱遣子入侍獻其珍寶願得都護天子以中國初定北邊未服皆還其侍子厚賞賜之二十二年賢發兵攻鄯善其冬復攻殺龜茲王遂兼其國鄯善王上書願復遣子入侍更請都護都護不出誠迫於匈奴天子報曰今使者大兵未能得出如諸國力不從心東西南北自在也於是車師鄯善復附匈奴而賢益橫

媯塞王自以國遠遂殺賢使者賢擊滅之立其國貴人
駟鞬為媯塞王賢又自立其子則羅為龜茲王賢以則
羅年少乃分龜茲為烏疊國徙駟鞬為烏疊王又更以
貴人為媯塞王又徙于闐王俞林為驪歸王立其弟位
侍為于闐王歲餘賢疑諸國欲叛召位侍及拘彌姑墨
于合王盡殺之不復置王但遣將鎮守其國莎車將君
得在于闐暴虐國人患之其夫人都未出城見野豕欲
射之豕乃言曰無射我我為汝殺君得都未因與兄弟
共殺君得賢引兵攻于闐兵敗而走于闐大人休莫霸
進圍莎車中流矢死兵乃退于闐立休莫霸兄子廣德

為王 **原**杜氏通典曰建武中廣德攻莎車執王賢殺
之匈奴聞廣德滅莎車遣兵將賢質子不居微立為王
章帝時長史班超發諸國兵擊破之由是遂降

阿鈞羌

增北史曰阿鈞羌在莎車西南國西有懸度山其間四
百里有棧道下臨不測之淵人行以繩索相持而度因
以名之

罽賓一

原杜氏通典曰罽賓在懸度山西漢時通焉王理循鮮
城去長安萬二千二百里不屬都護戶口勝兵多大國

也東北至都護理所六千八百里東至烏秣國二千二
百里東北至難兜國九日行西北與大月氏西南與烏
弋山離接

增漢書曰昔匈奴破大月氏大月氏西居
大夏而塞王南居罽賓罽賓地平温和有苜蓿雜草奇
木檀懷梓竹漆種五穀葡萄諸果地下濕生稻冬食生
菜其民巧雕文刻鏤治宮室織罽刺文繡好治食有金

銀銅錫以為器市列以金銀為錢文為騎馬幕為人面
錢文面作騎馬形漫而作人面
目幕音漫謂平而無文也出封牛水牛象大狗沐猴
孔雀珠璣珊瑚琥珀辟流離

原杜氏通典曰自漢武
帝始通罽賓自以絕遠漢兵不至雖遣使貢獻屢殺漢

使至成帝時又遣使者奉獻漢欲遣使者報送其使杜
欽說大將軍王鳳曰凡中國所以為通厚蠻夷愜快其
求者為瓌比而為寇也今懸度之阨非罽賓所能越也
其鄉慕不足以安西域雖不附不能危城郭

城郭總謂西域諸國
也今遣使皆行賈賤人欲通貨市買以朝獻為名故煩
使者送至懸度恐失實見欺凡遣使送客者欲防護寇

害也起皮山南更不屬漢之國四五斥候士百餘人五
分夜擊刁斗自守尚時為所侵盜驢畜負糧須諸國廩

食得以自贍國或貧小不能食或桀黠不肯給擁強漢
之節餒山谷之間離一二旬則人畜棄捐曠野而不反

又歷大頭痛小頭痛之山赤土身熱之阪令人身熱無色頭痛嘔吐驢畜盡然又有三池盤石阪道陁者尺六七寸長者徑三十里臨崢嶸不測之深行者騎步相持繩索相引二千餘里乃到懸度險阻危害不可勝言聖王分九州制五服務盛內不求外今遣使者承至尊之命送蠻夷之賈勞吏士之衆涉危難之路罷弊所恃以事無用非久長計也於是鳳白從欽言

蜀賓二

增頭痛山

身熱阪俱見

漕國

增北史曰漕國在葱嶺之北漢時蜀賓國也其王姓昭武康國王之宗族都城方四里勝兵萬餘人國法嚴整殺人及盜皆死其俗淫祀葱嶺山有順天神者儀制極華金銀鑠為屋以銀為地祀者日千餘人祠前有一魚脊骨其孔中通馬騎出入北去帆延七百里東去劫國六百里南去瓜州六千六百里大業中遣使貢方物新唐書曰唐武德二年遣使貢寶帶金鎖水精釀頗黎狀若酸棗貞觀中獻名馬十六年獻禱特鼠喙尖尾赤能食蛇螫者嗅且尿瘡即愈開元七年遣使獻天文及祕方奇藥其王請以子拂林蜀婆嗣聽之

邊塞部

卷二百三十七

漕國撒馬兒罕

三

撒馬兒罕一

續文獻通考曰撒馬兒罕地在亦力把力西西連哈烈東至肅州九千里即漢之罽賓地東去嘉峪關九千九百里土田膏腴宜五穀饒衍甲諸國人物秀美多藝能元駙馬帖木兒主其國東有養夷沙鹿海牙賽藍達失干西有渴石迭里迷諸城皆隸焉明洪武丁卯國王帖木兒遣回回滿刺哈非思等貢駝馬詔厚賜之弘治三年由海道貢獅子禮官倪岳言南海非西域貢道請却之自後皆從嘉峪關入嘉靖中其國稱王者五十三人皆遣人朝貢

撒馬兒罕二

增鐵門峽 火車站 明一統志鐵門峽在渴石城西懸崖絕壁高數十仞深二三里夷人守此名鐵門關 河在沙鹿海牙城西

答兒密

續文獻通考曰答兒密在海中地不百里人不滿千家服屬撒馬兒罕明永樂中遣使十八人來朝貢方物賜大統曆西北有小國曰哈三曰哈撒兒沙的蠻曰哈失哈兒曰哈的蘭曰賽蘭曰希蘭曰亦力把力曰也克力曰把丹沙曰把力黑曰俺力麻曰脫忽麻曰察力失曰幹失曰卜哈刺曰怕刺曰失刺思曰你沙兀兒曰克

邊報部 開盤頁 卷三十七 答兒密 沙鹿海牙

失迷兒曰帖必力思曰果撒思曰火壇曰火占曰苦先
曰沙鹿海牙曰牙者曰牙兒干曰戎曰兀倫曰阿迷曰
邪思城曰坤城曰捨墨曰擺音曰克札曰元方曰日落
諸國皆經哈密入貢或三年五年無恒期後哈密殘破
多徑叩嘉峪關然亦未數至

沙鹿海牙

增象胥錄曰沙鹿海牙在撒馬兒罕東五百里城據小
岡西北臨山河河名水站勢衝急有浮梁其地南山三
面皆平川居人依崖谷頗繁庶西有大沙洲可二百餘
里無水間有水不可飲牛馬飲輒死有臭草根株獨立

高尺許枝葉如蓋穢氣逼人取生汁熬膏即阿魏也亦
有細草以熬膏味如蜜

賽蘭

攷象胥錄曰賽蘭一作賽藍去撒馬兒罕千里在達失
干東城周三里有浮圖為祈拜之所四面平原流水環
繞草木豐茂五穀蕃殖夏秋間草生黑蜘蛛小而甚毒
齧人遍體作痛號呼動地土人誦咒禳解以薄荷枝拂
毒處又以羊肝擦之一晝夜痛息膚如蛻牛馬被傷輒
死行人宿必近水避焉

達失干

邊塞部

增補頁為卷三十三

賽蘭達失干渴石

三

增象胥錄曰達失干在賽蘭西去撒馬兒罕七百里城甚狹小四面平岡溪流蜿蜒多林木土宜五穀居民稠密俗朴而饒

渴石

增象胥錄曰渴石在撒馬兒罕西南二百六十里城周十餘里四面水田東南近山中有園林頗宏麗元帖木兒駙馬居也墻壁窗櫺飾以金碧琉璃堂四隅白石柱如玉西行十餘里多奇樹又西三百里大山屹立中有石硤兩壁懸崖如斧劈行二三里出硤石有門石色如鐵人指云此鐵門關也元太祖至東印度駐鐵門關有

一角獸形如鹿而馬尾其色綠作人言以問耶律楚材對曰此瑞獸名角端能言四方語好生惡殺帝為班師蓋其地近東印度矣

迭里迷

增象胥錄曰迭里迷去哈烈二千餘里在撒馬兒罕西南新舊二城相去十餘里王居新城東距阿木河河廣非舟不可渡多魚城內外居民僅數百家孳畜蕃息河東地隸撒馬兒罕河西有蘆林多獅子

卜花兒

增象胥錄曰卜花兒在撒馬兒罕西七百里城居平川

周十餘里市里華庶戶口萬計地廣衍宜五穀天氣溫和產布帛絲綿大類中國

養夷

增象胥錄曰養夷在賽蘭撒馬兒罕亦力把力蒙古諸部落間數相侵掠無寧居惟數百人戍孤城四面皆亂山東北有大溪西流長數百里

納失者罕

增象胥錄曰納失者罕東去失刺思數日程皆舟行海中其國有山林川澤魚蟲城東平原饒水草可牧馬馬有數種最小者高不過三尺俗重僧所至飲食之顧尚

氣健鬪以不勝為嗤鄙永樂中遣使朝貢

俺都淮

增象胥錄曰俺都淮西南去哈烈千三百里東北去撒馬兒罕如之土沃人稠稱樂土永樂中嘗遣使朝貢

八刺黑

增象胥錄曰八刺黑一名八黑在俺都淮東北城居平川周十餘里南近山無險地廣物豐饒西南諸番賈聚焉又八答黑商其國奉佛浮圖壯麗如王宮永樂間朝貢方物織皮絨麝香木疑即八刺黑

亦思把罕

邊

增

俺都淮八刺黑亦思把罕

象胥錄曰亦思把罕廣袤近千里於西南海中爲大國四面皆海西北多山東南皆平沙王居宏麗城亦堅壯產饒俗朴食惟麥糝麥粒麤而甘美少布帛稻黍多馬駝琥珀亦有中國人流寓時賈撒馬兒罕以取給永樂中遣使朝貢亦云亦思弗罕

亦力把力

增續文獻通考曰亦力把力不知古何國地居沙漠間在肅州西北三千七百里疑即焉耆或龜茲地也龜茲國在白山南都延城今其地東西三千餘里南北二千餘里東距火州西抵撒馬兒罕南接于闐北連瓦剌地

無房屋逐水草置氈帳以居少五穀畜牛羊駝馬飲食惟肉酪衣服類回回語言類畏兀兒其王髡髮戴單刺帽插鷄鵝翎設綵繡氈帳席地而坐與使者相見不拜揖惟行跪禮其山有白山中常起火煙蓋出礪砂之處採者著木底鞵取之皮著即焦有熱海周數百里俗呼亦息渴兒所產有銅鐵鉛雌黃胡粉馬犛牛孔雀氈氍駝葡萄刺蜜亦有阿魏白氈布礪砂元名其地爲別失八里憲宗分建諸王合丹於此世祖立宣慰司以萬戶綦公直爲使後置元帥府以領屯田明洪武二十四年國王黑的兒火者遣使貢馬永樂四年貢玉璞十六年

至思弒其從兄王納黑失只罕自立為王徙其國西去
遂更國號亦力把力

條支

原杜氏通典曰條支漢時通焉去陽關二萬二千一百
里在葱嶺西城在山上週迴四十餘里臨西海海水曲
環其南及東北三面路絕惟西北隅通陸道 **增**文獻

通考曰土地暑濕田宜稻有大鳥卵如甕善眩其草木
畜產五穀果菜食飲宮室市列錢貨兵器金珠之屬皆
與罽賓同而有桃拔獅子犀牛 桃拔一名符拔似鹿長尾一角者或為天鹿兩角者或為辟邪其錢獨文為人慕為驕馬 **原**杜氏通典曰和

帝永元中班超遣掾甘英使大秦抵條支臨大海欲渡
而安息西界船人謂英曰海水廣大往來者逢善風三
月乃得渡若遇惡風雨亦有三歲者英聞而止 **增**漢
書曰安息長老傳聞條支有弱水西王母亦未嘗見也
自條支乘水西行百餘日近日所入云

波斯

原杜氏通典曰波斯後魏時通焉在達曷水之西都宿
利城 後周書云蘇利城隋書云蘇利城有河經其城中南流
即條支之故地也大月氏之別種其先有波斯匿王其
子孫以王父字為氏因為國號焉王姓波斯戶十餘萬

東去中國萬餘里西去海數百里東南去穆國四千餘里西北去拂菻四千五百里 **增**文獻通考曰有樓觀屋宇佛寺城西十五里有土山山周迴高大其勢連接甚遠中有鷲鳥瞰羊土人極以為患其王坐金羊座戴金花冠衣錦袍織成帔飾以真珠寶物其俗丈夫剪髮戴白皮帽貫頭衫兩肩近下開之并巾帔緣以織成婦人服大衫帔仍貫五色珠絡之於膊王即位後擇諸子內賢者密書其名封於庫王死乃共發書立為王餘子各出就邊任國人號王曰醫贊才割反妃曰防步率王之諸子曰殺野其刑法重罪懸竿射而殺之次則繫獄新

王立乃釋以六月為歲首尤重七月七日十二月一日其日設會作樂以相歡娛氣候暑熱家自藏冰其地多砂磧引水溉灌其五穀及禽獸與中夏畧同唯無稻黍土出名馬及駝象獅子多良犬有大鳥形如橐駝有兩翼飛而不能高食草與肉亦能瞰人有大鳥卵真珠頗黎珊瑚琉璃瑪瑙水精瑟瑟金銀鍮石金剛火齊銅錫鑛鐵朱砂水銀錦疊細布曜瑜甃甃護那越諾布金鏤織成赤麋皮熏陸鬱金蘇合青木等香胡椒萹撥石蜜千年棗香附子訶黎勒無食子鹽綠雌黃又有優鉢曇花鮮華可愛地有鹹池俗尊右下左祠天地日月水火

戰乘象魏神龜中其國遣使上書貢物云大國天子天之所生願日出處常為漢中天子波斯國王居和多千萬敬拜朝廷嘉納之唐貞觀十二年遣使朝貢又獻活褥蛇狀類鼠色正青長八九寸能入穴取鼠龍朔初又訴為大食所侵時天子遣使西域分置州縣以疾陵城為波斯都督府拜其王為都督咸亨中入朝授右武衛將軍死始其子泥涅師為質調露元年詔裴行儉將兵護還復王其國至安西碎葉以道遠行儉還泥涅師因客土火羅景龍初復來朝授左威衛將軍無何病死其國滅而部眾猶存開元天寶間遣使者十輩獻瑪瑙牀

火毛繡舞筵 續文獻通考曰遼太祖天贊二年波斯來貢

大食一

道新唐書曰大食本波斯地隋大業中有波斯國人牧於俱紛摩地那山有獸言曰山西三穴有利兵黑石而白文得之者王走視如言石文言當反乃詭眾糾亡命於恒曷水劫商旅保西鄙自王於是遂滅波斯永徽二年始遣使朝貢自言王大食氏有國三十四年傳二世其王嘗遣人入海經八年而未極西岸海中見一石上有樹幹赤葉青樹上總生小兒長六七寸見人不語而

能笑動其手足頭著樹枝人摘取入手即乾黑其使得
一枝獻在王宮開元初遣使獻馬鈿帶其使謁見平立
不拜憲司欲糾之中書令張說奏曰大食殊俗遠來慕
義不可置罪上特許之尋又遣使來獻自云本國惟拜
天神雖見王亦無致拜之法有司屢詰責之遂依漢法
致拜 文獻通考或曰大食族中有孤列種世為長號
白衣大食種有二姓一曰盤尼末換二曰奚深有摩訶
末者勇而智眾立為主關地三千里克夏臘城傳十四
世至末換殺兄伊疾自王下怨其忍有呼羅珊木鹿人
並波悉林將討之徇眾曰助我者皆黑衣服而眾數萬

即殺末換求奚深種孫阿蒲羅拔為王更號黑衣大食
宋太平興國二年遣使貢方物其從者目深體黑謂之
崑崙奴雍熙元年國人花茶復來獻花錦越諾揀香白
龍腦白沙糖薔薇水琉璃器淳化四年又遣其副蕃長
李亞勿來貢其國船主蒲希密至南海以老病不能詣
闕乃以方物附亞勿來獻希密進象牙乳香賓鐵紅絲
古貝五色雜花番錦白越諾琉璃瓶無名異薔薇水等
詔賜希密敕書錦袍銀帶以答之至道元年其國船主
蒲押陀黎齋蒲希密表引對於崇政殿譯者代奏云父
蒲希密因緣射利泛舶至廣州逮今五稔未歸母令臣

遠來尋訪昨至廣州見之具言前歲蒙皇帝聖恩今命臣奉章來謝以方物致貢大中祥符元年十月車駕東封船主陀婆離上言願執方物赴泰山從之其國部屬各異名故有勿巡有陀婆離有俞盧和地有麻囉拔等國然皆冠以大食勿巡所貢又有龍腦兜羅錦毬錦襪番花簞陀婆離有金飾壽帶連環臂鈎數珠之屬其國在泉州西北自泉州發船四十餘日至藍里博易住冬次年再發順風六十餘日方至其國本國所產與三佛齊貿易商賈轉販以致中國其地廣袤民俗侈麗天氣多寒雪厚二三尺故貴氍毹國據諸番衝要其王錦衣

玉帶朔望戴百寶純金冠其居以瑪瑙為柱綠甘為壁水晶為瓦碌石為甃活石為灰帷幕之屬悉用百花錦官有丞相太尉各領兵二萬餘人續文獻通考曰遼太祖三年大食國來貢聖宗開泰九年大食國王遣使進象及方物為其子冊割請婚以王子班郎君胡思聖女可老封公主降之

大食二

增記杜瓌經行記曰大食一名亞俱羅其王號暮門都此處其士女瓌偉長大衣裳鮮潔容止閑麗女子出門必擁蔽其面無問貴賤一日五時禮天食肉作齋以殺

生為功德繫銀帶佩銀刀斷飲酒禁音樂有禮堂容數
萬人每七日王出禮拜登高座為眾說法曰人生甚難
天道不易奸非劫竊細行謾言安已危人欺貧虐賤有
一於此罪莫大焉凡有征戰為敵所戮必得生天殺其
敵人獲福無量率土稟化從之如流法唯從寬葬唯從
儉郭郭之內里開之中土地所生無物不有四方輻湊
萬貨豐賤錦繡珠貝滿於市肆駝馬驢騾充於街巷刻
石木為廬舍有似中國寶壘每至節日則獻貴人琉璃
器皿鍮石瓶鉢蓋不可數算其果有扁桃千年棗其蔓
菁根大如斗而圓味甚美餘菜亦與諸國同葡萄大者

如雞子香油貴者有二一名耶塞漫一名沒國女甲反
師香草貴者有二一名查塞菴蒲孔反一名藜蘆茛綾
絹機杼金銀匠畫匠漢匠起作畫者京兆人樊淑劉泚
織絡者河東人樂隈呂禮又有橐駝駕車其馬俗云西
海濱龍與馬交所產也腹小腕長善者日走千里其駝
小而緊背有孤峰良者日馳千里又有駝鳥高四尺以
止足似駝蹄頸項勝人騎行五六里其卵大如二升又
有薺樹實如夏棗堪作油食除瘴其氣候溫土地無冰
雪人多瘡癩一年之內十中五死吞滅四五十國皆為
所役屬分其兵鎮守其境盡於西海焉又未祿國在亞

梅國西南七百餘里胡姓末者茲土人也其城方十五里鐵為城門城中有鹽池其境東西百四十里南北百八十里邨柵連接樹木交映四面合匝總是流沙南有大河流入其境分渠數百灌溉一川其土沃饒其人淨潔墻宇高厚市廛平正木既雕刻土亦繪畫又有細軟疊布羔羊皮裘果有紅桃白奈過白黃李瓜大者名尋支十餘人餐一顆輒足越瓜長四尺以上菜有蔓菁蘿蒲長葱顆葱芸薹胡芹葛藍單達茴香笑薤瓠蘆尤多葡萄又有黃牛野馬水鴨石雞其俗以五月為歲首歲以畫缸相獻有打球節鞦韆節其大食東道使鎮於此

又苦國在大食西界周迴數千里造屋兼瓦壘石為壁米穀殊賤有大川東流入亞俱羅商客糴此糶彼往來相繼人多魁梧衣裳寬大有似儒服其苦國有五節度兵馬一萬以上北接可薩突厥可薩北又有突厥足似牛蹄好噉人肉

伏盧尼

後魏書曰伏盧尼國都伏盧尼城在波斯國北累石為城東有大河南流中有鳥其形似人亦有如橐駝馬者皆有翼常居水中出水便死城北有云尼山出銀珊瑚琥珀多獅子

安息

源杜氏通典曰安息國漢時通焉王理番兜城番音去長安萬一千六百里在葱嶺之西大宛之西可數千里不屬都護北與康居東與烏弋山離西與條支接

增漢書曰土地風氣物類民俗與烏弋罽賓同亦以銀為錢文獨為王面幕為夫人面有大馬爵其屬大小數百城方數千里最大國也臨媯水商賈車船行旁國書革旁行為書記武帝始遣使至安息其王令騎迎於東界去王都數千里行比至過數十城人民相屬因發使隨漢使者以大鳥卵及犁靛眩人獻於漢 後漢書曰其

東界木鹿城號為小安息章和元年遣使獻獅子符拔符拔形似麟而無角自安息西行三千四百里至阿蠻國從阿蠻西行三千六百里至斯賓國從斯賓南行渡河又西至于羅國九百六十里安息西界極矣自此南乘海乃通大秦其土多海西珍奇異物

安國

增隋書曰安國漢時安息國也王姓昭武與康國王同族都那密水南城有五重環以流水宮殿皆為平頭王坐金駝座高七尺風俗同於康國煬帝遣杜行滿使西域至其國得五色鹽而返大業五年遣使貢獻

鳥獸部

安國大夏吐火羅

大夏

杜氏通典曰大夏漢時通焉在大宛西南二千餘里
媯水南其俗土著有城屋與大宛同俗去漢萬二千里
居漢西南本無大君長城邑往往置小君長其兵弱畏
戰 史記曰其都曰藍市城有市販賣諸物東南有身
毒國張騫曰臣在大夏時見筇竹杖蜀布問曰安得此
大夏國人曰吾賈人往市之身毒身毒國在大夏東南
可數千里

吐火羅

增新唐書曰吐火羅或曰土豁羅曰觀貨羅元魏謂吐

呼羅者居葱嶺西烏訥河之南古大夏地與挹怛雜處
勝兵十萬國土著少女多男北有頗黎山其陽穴中有
神馬國人遊牧牝於側生駒軻汗血其王號葉護武德
貞觀時再入獻永徽元年獻大鳥高七尺色黑足類橐
駝而身日三百里能噉鐵俗謂駝鳥顯慶中以其
阿緩城爲一氏都督府析小城爲二十四州授王阿史
那都督後二年遣子來朝俄又獻瑪瑙鎧樹高三尺開
元天寶間獻馬驥異藥乾陀婆羅二百品紅碧玻璃
乃冊其君爲吐火羅葉護挹怛

噉

邊塞部

吐火羅噉

後魏書曰厭曠國六月六之種類也亦曰高車別種
其原出於塞北自金山而南在於闐之西都烏許水南
二百餘里去長安一萬一百里其王都拔底延城蓋王
全賦也其地方音饒里多寺塔皆飾以金風俗與突厥
同其俗兄弟共一妻夫無兄弟者妻戴一角帽若有
兄弟者依其多少之數更加角焉衣服類加纓絡頭皆
剪髮其王巡歷而行每月一處冬寒時三月不徙王位
不必傳子子弟堪者死更受之用刑嚴急偷盜無多少
皆腰斬其八凶悍之至西域康居于闐沙勒安息及
諸小國皆役屬之

挹怛

增隋書曰挹怛國都烏許水南二百里大月氏種也勝
兵五六千人善戰俗同吐火羅南去曹國千五百里東
去瓜州六千五百里隋大業中遣使來貢 文獻通考
曰按劉璠梁與滑國姓厭曠後裔以姓為國號轉訛又
謂之挹怛焉

副貨

增北史曰副貨國東至阿富汗且國西至沒誰國中間
相去千里南有連山不知名北至奇沙國相去千五百
里國中城周匝七十里宜五穀葡萄國王有黃金殿殿

下金駝七頭高三尺孝文帝時遣使朝貢

疊伏羅

增北史曰疊伏羅國去代三萬一千里國中有勿悉城城北有鹽竒水西流有白象并有阿末黎木皮織作布土宜五穀宣武時遣使獻方物

拔豆

增北史曰拔豆國去代五萬一千里東至多勿當國西至旃那國中間相去七百五十里南至罽陵伽國北至弗那伏且國中開相去九百里國中出金銀雜寶白象水牛羴牛葡萄五果土宜五穀

朱居波

增杜氏通典曰朱居波後魏時通焉亦名朱居槃國漢子合國也并有西夜蒲犁依耐得若四國之地在于闐國西千餘里其西至渴槃國南至女國三千里北至疏勒九百里東至葱嶺二百里其王本疏勒國又宣武永平中遣使朝貢唐武德以後頻遣使朝貢

渴槃陀

增文獻通考曰渴槃陀後魏時通焉亦名漢陀國亦名渴羅國治葱嶺中在朱居波國西西至護密國其南至懸度山無定界北至疏勒國界西北至判汗國其王本

邊塞部 朱居波渴槃陀 錄和 三二

疏勒人懸度山在國西南四百里懸度者名山也谿谷不通以繩索相引而度其間四百里中往往有棧道因以為名懸度葱嶺迤邐相屬郵置所絕道阻且長故行人由之莫能分別又有頭痛山在國西南鄉屬賓歷大頭痛小頭痛之山赤土身熱之阪其葱嶺俗號極嶷山其國衣服語貌與于闐相似書與婆羅門同人山居勁健有音樂兵器有甲稍弓刀國法殺人劫賊者死餘罰其稅雜輸之服飾婚姻同疏勒太武帝天延三年朝獻於後不絕

鉢和

增後魏書曰鉢和在渴槃陀西其土尤寒人畜同居穴地而處又有大雪山望若銀峰其人食麩服氈有二道一道西行向噉噠一道西南趣烏葺為噉噠所統

波知

增後魏書曰波知國在鉢和西南土狹人貧依託山谷其王不能總攝有三池傳云大池有龍王次有龍婦小者龍子行人經之設祭始過不則多遇風雪

賒彌

增後魏書曰賒彌國在波知之南山居不信佛法專事諸神亦附噉噠東有鉢盧勒國路嶮緣鐵鎖而度下不

邊塞部

洪鑑類函卷二百三十一

波知賒彌烏葺

見底熙平中遣使宋雲等竟不能達

烏菴

增北史曰烏菴在賒彌南北有葱嶺南至天竺婆羅門為其上族婆羅門多解天文吉凶之數其主動則訪決焉土多林果引水灌田豐稻麥寺塔華麗人有爭訟服以藥曲者發狂直者無恙為法不殺犯罪惟徙之靈山西南有檀特山山上立寺以驢數頭運食山下無人控御自知往來

乾陀

增後魏書曰乾陀國在烏菴西本名業波為厭曠所破

因改焉其王本敕勒臨國已二世矣好征戰與罽賓鬪三年不罷人怨苦之有關象七百頭十人乘一象皆執兵仗象鼻縛刀以戰所都城東南七里有佛塔高七丈周三百步即所謂雀離佛圖也

謝颺

增新唐書曰謝颺居吐火羅西南本曰潛矩吒唐顯慶時謂訶達羅支武后改今號東距罽賓東北帆延皆四百里南婆羅門西波斯北護時健其王居鶴悉那城七千里多鬱金麗草國中有突厥罽賓吐火羅種人雜居景雲初遣使朝貢後遂臣罽賓開元八年天子冊葛達

羅支頡利發誓屈爾為王至天寶中數朝貢

帆延

增文獻通考曰帆延者或曰望行曰梵行那居斯卑莫運山之旁西北與護時健接東南距罽賓西南訶達羅支與吐火羅連境地寒人穴居王治羅爛城有大城四五水北流入烏訶河貞觀初遣使入朝顯慶三年以羅爛城為寫鳳都督府縛時城為悉萬州授王葡萄寫鳳州都督管內五州諸軍事自是朝貢不絕

石汗那

增文獻通考曰石汗那或曰斫汗那自縛底野南入雪

山行四百里得帆延東臨烏訶河多赤豹開元天寶中一再朝獻

識匿

增文獻通考曰識匿或曰屍棄尼曰瑟匿東南直京師九千里東五百里距葱嶺守捉所南三百里屬護密西北五百里抵俱蜜初治若汗城後散居山谷有大谷五酋長自為治謂之五識匿地二千里無五穀人喜攻剽劫商賈唐貞觀二十年借似沒役槃二國使者來朝開元十二年授王布遮波資金吾衛大將軍似沒者北接石上俗與康同役槃亦與康鄰出良馬俱蜜者治山中

在吐火羅東北南臨黑河其王突厥延陀種貞觀十六年遣使者入朝開元中獻胡旋舞女護密者或曰達摩悉鐵帝曰鑊侶

劫國

增文獻通考曰劫國隋時聞焉在葱嶺中西與南俱與賒彌國界接西北至挹怛國去長安萬二千里有戶數萬氣候熱有稻麥粟豆羊馬出洛沙青黛唐武德二年遣使貢寶帶金鎖玻璃水精杯各一頗梨四百九十枚大者如棗小者如酸棗

陀羅伊羅

增杜氏通典曰陀羅伊羅隋時聞焉在烏茶國北大雪山坡上緣梯登山接七百梯方到其國

越底延

增文獻通考曰越底延國隋時聞焉治辛頭河北南至婆羅門國三千里西北至賒彌國千餘里東北至瓜州五千四百里其王婆羅門種戶數萬有弓矢刀稍皮甲國法不殺人重罪流輕者杖國無課稅其俗事佛書同婆羅門王及庶人被髮衣錦袍不開縫貧者衣白疊俗清潔氣候溫多稻有羊馬多牛出鑰石訶黎勒石蜜麩皮細疊

卷一百一十一

增補

越底延六月氏

大月氏

原杜氏通典曰大月氏漢時通焉理藍氏城在大宛西可二千里居媯水北其南則大夏西接安息四十九日行北則康居去長安萬一千六百里不屬都護戶十萬東去長史所居六千五百里其國本行國也隨畜移徙與匈奴同俗控弦十餘萬故恃強輕匈奴本居燉煌祁連間至冒頓單于攻月氏而老上單于殺月氏王以其頭為飲器乃遠去過大宛西擊大夏而臣之都媯水北為王庭其餘小眾不能去者保南山羌號小月氏

增後漢書曰月氏遷於大夏分其國為休密雙靡貴霜

盼頓都密凡五部翎侯後百餘歲貴霜翎侯攻密四翎侯自立為王國號貴霜侵安息滅僕達屬賓悉有其國復滅天竺月氏自此富盛諸國稱之皆曰貴霜王漢本其故號言大月氏云 北史曰北與蠕蠕接數為所侵遂西遷都薄羅城後魏太武時其國人商販到京師自云能鑄石為五色琉璃於是採礦鑄之既成光澤美於西方來者乃詔為行殿容百餘人光色映徹觀者驚以為神

小月氏

增後魏書曰小月氏治富樓沙城其王本大月氏王寄

多羅子也寄多羅為匈奴所逐西徙後令其子守此城
因號小月氏在波路西南先居西平張掖之間被服與
羌同其俗以金銀錢為貨隨畜牧移徙類匈奴其城東
十里有佛塔周三百五十步高八十丈自佛塔初建計
至武定八年八百四十二年所謂百丈佛圖也 文獻
通考曰晉天福時有仲雲旋居胡盧磧即其遺種

高附

增文獻通考曰高附後漢時通焉在大月氏西南亦大
國也其俗似天竺而弱善賈販內富於財所屬無常天
竺罽賓安息三國強即得之弱即失之

淵鑑類函卷二百三十七

